


濟寧州志

二十五二十六



DS
793
S42
C5532
1785
v.15



1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100
101
102
103
104
105
106
107
108
109
110
111
112
113
114
115
116
117
118
119
120
121
122
123
124
125
126
127
128
129
130
131
132
133
134
135
136
137
138
139
140
141
142
143
144
145
146
147
148
149
150
151
152
153
154
155
156
157
158
159
160
161
162
163
164
165
166
167
168
169
170
171
172
173
174
175
176
177
178
179
180
181
182
183
184
185
186
187
188
189
190
191
192
193
194
195
196
197
198
199
200
201
202
203
204
205
206
207
208
209
210
211
212
213
214
215
216
217
218
219
220
221
222
223
224
225
226
227
228
229
230
231
232
233
234
235
236
237
238
239
240
241
242
243
244
245
246
247
248
249
250
251
252
253
254
255
256
257
258
259
260
261
262
263
264
265
266
267
268
269
270
271
272
273
274
275
276
277
278
279
280
281
282
283
284
285
286
287
288
289
290
291
292
293
294
295
296
297
298
299
300
301
302
303
304
305
306
307
308
309
310
311
312
313
314
315
316
317
318
319
320
321
322
323
324
325
326
327
328
329
330
331
332
333
334
335
336
337
338
339
340
341
342
343
344
345
346
347
348
349
350
351
352
353
354
355
356
357
358
359
360
361
362
363
364
365
366
367
368
369
370
371
372
373
374
375
376
377
378
379
380
381
382
383
384
385
386
387
388
389
390
391
392
393
394
395
396
397
398
399
400
401
402
403
404
405
406
407
408
409
410
411
412
413
414
415
416
417
418
419
420
421
422
423
424
425
426
427
428
429
430
431
432
433
434
435
436
437
438
439
440
441
442
443
444
445
446
447
448
449
450
451
452
453
454
455
456
457
458
459
460
461
462
463
464
465
466
467
468
469
470
471
472
473
474
475
476
477
478
479
480
481
482
483
484
485
486
487
488
489
490
491
492
493
494
495
496
497
498
499
500
501
502
503
504
505
506
507
508
509
510
511
512
513
514
515
516
517
518
519
520
521
522
523
524
525
526
527
528
529
530
531
532
533
534
535
536
537
538
539
540
541
542
543
544
545
546
547
548
549
550
551
552
553
554
555
556
557
558
559
560
561
562
563
564
565
566
567
568
569
570
571
572
573
574
575
576
577
578
579
580
581
582
583
584
585
586
587
588
589
590
591
592
593
594
595
596
597
598
599
600
601
602
603
604
605
606
607
608
609
610
611
612
613
614
615
616
617
618
619
620
621
622
623
624
625
626
627
628
629
630
631
632
633
634
635
636
637
638
639
640
641
642
643
644
645
646
647
648
649
650
651
652
653
654
655
656
657
658
659
660
661
662
663
664
665
666
667
668
669
670
671
672
673
674
675
676
677
678
679
680
681
682
683
684
685
686
687
688
689
690
691
692
693
694
695
696
697
698
699
700
701
702
703
704
705
706
707
708
709
710
711
712
713
714
715
716
717
718
719
720
721
722
723
724
725
726
727
728
729
730
731
732
733
734
735
736
737
738
739
740
741
742
743
744
745
746
747
748
749
750
751
752
753
754
755
756
757
758
759
760
761
762
763
764
765
766
767
768
769
770
771
772
773
774
775
776
777
778
779
780
781
782
783
784
785
786
787
788
789
790
791
792
793
794
795
796
797
798
799
800
801
802
803
804
805
806
807
808
809
810
811
812
813
814
815
816
817
818
819
820
821
822
823
824
825
826
827
828
829
830
831
832
833
834
835
836
837
838
839
840
841
842
843
844
845
846
847
848
849
850
851
852
853
854
855
856
857
858
859
860
861
862
863
864
865
866
867
868
869
870
871
872
873
874
875
876
877
878
879
880
881
882
883
884
885
886
887
888
889
890
891
892
893
894
895
896
897
898
899
900
901
902
903
904
905
906
907
908
909
910
911
912
913
914
915
916
917
918
919
920
921
922
923
924
925
926
927
928
929
930
931
932
933
934
935
936
937
938
939
940
941
942
943
944
945
946
947
948
949
950
951
952
953
954
955
956
957
958
959
960
961
962
963
964
965
966
967
968
969
970
971
972
973
974
975
976
977
978
979
980
981
982
983
984
985
986
987
988
989
990
991
992
993
994
995
996
997
998
999
1000

濟寧直隸州志卷二十五

人物三

國朝

○潘士良字舜佐號虞廷幼穎異染肆火亡其簿士良嘗寓目取筆覆記無遺登萬歷四十一年進士知蠡縣有聲擢御史天啓初巡按蘓松三吳知名士多蒙獎拔織造太監李實疏請有司行屬禮聽叅劾士良同巡撫周起元上章糾之實又違例擅勾機匠士良再糾之還朝遷太僕卿具疏極論忠賢語剴切左遷南京光祿寺杜門不出崇正初召

拜大理卿晉刑部侍郎未幾告歸流寇陷京師遣
僞權將軍郭升徇山東所至官吏望風奔竄濟寧
旣下留僞防禦使張問行僞知州任崇志掌旅傳
龍守之勒索士民助餉甚急士良與孟瑄等集衆
舉義兵盡殲賊徒衆推士良行總督事練鄉勇爲
九營保障河濟間會

皇朝定鼎乃罷兵家居已而循例入都授兵部侍郎撫
治鄖陽勦寇綏民殘黎賴之歲餘致仕歸年九十
一卒順治十六年也士良爲人恬淡儉素平居藹
然可親八旬餘始舉子壽考令終人咸以爲厚德

之報云子兆元兆遴

舊志

○陳展銘字我愚號揚先伯友仲子也崇正十六年
進士授山西汾州府推官未任賊已破汾州矣入
國朝改除陝西宜川知縣縣當秦涼孔道萑苻族聚
展銘招來渠首王永强等推誠懷之順治三年寧
夏鎮標將王元馬德乘兵譁作亂聞總督集兵會
勦懼而逃謀自宜川西走隴坂合賀珍于成紀展
銘檄王永强邀之山口出不意殲其衆擒元等送
軍前乃招徠勸農人樂更生葺學舍建書院士風
丕振兩預分校棘闈所取皆名宿奏最擢吏科左

給事中尋遷右知無不言如正國是汰浮屠飭法
紀禁賄賂諸條皆甚剴切而劾察戶部侍郎孫塔
特貴戚橫索騷擾驛夫直聲震天下十年轉禮科
仍掌吏科給事中銓者意有所私委衆會議展銘
正色直言重拂銓者之意因嫉而排斥之注曰樸
誠宜堪外用謫河南布政司經歷攝汲縣事平獄
訟却餽遺再攝汝州盡革舊弊政簡刑清遷大理
寺寺正旋引年歸年八十二卒於家詩文雅練著
有崇樸齋稿二卷

據行狀

○李以易號希九明崇正十五年舉人順治初授常

州府推官有節操以憂家居立興文書院捐膏火課士經指授者多成名服闋升鳳陽知府不久掛冠歸淡薄不異寒士以讀書立品訓後進子澄及

孫楨康熙十七年同榜舉人楨登進士

臧子彥史外傳逸

○尹牧民字司牧以前明選貢授館陶訓導遷歷城教諭尋補華亭縣丞以老免歸牧民學問淵博志行疎爽理學經術研究實用不務虛浮其立教欲人各隨性成不爲嚴督苛責其友誚之曰師道貴嚴子何輕脫乃爾笑曰易云擊蒙不利爲寇蒙以養正顧養之何如耳豈必如司空城旦書乎居官

亦如之在華亭年踰大耋猶勤敏無廢事既免前
濟寧知州松江府知府李正華爲具舟歸之再爲
鄉飲大賓九十餘卒

舊志在
文苑

○周於德字元錫元公五十六代孫也其先于元末
遷聞喜八世祖通府以指揮隨靖難軍家濟寧之
王貴屯於德年十四補邑庠生明末盜起有稱齊
天王者據嘉祥滿家碕復結潭口興福諸村寨爲
黨援日肆劫剝於德勸父捐家財募強壯者三百
人濬濠築堡賊不敢犯知州奇之表爲鄉帥率官
兵擣賊巢不旬日殲之回軍將屠潭口諸寨於德

曰此良民爲賊逼耳遂單騎往諭以禍福衆皆感泣歸命入

國朝以優貢生爲江南贛榆知縣時海寇方熾城邑蕭條前令往往掛冠去於德外禦強寇內撫疲民七閱月安堵如故以才能薦不就歸作半世堂課子以老世傳文學元孫周裔和乾隆十年進士裔良裔豐並舉人

採訪下全者省注

○李用質字文含孝友有至性英敏能文崇正十三年第進士授山西襄陵知縣潔已愛民興學育才戶口食鹽濫派地畝者力請蠲豁釐正驛馬爲牧

養省煩費懲郵亭歲大饑賑採多方全活甚衆設
法墾荒民得復業嘗攝篆臨汾責成修練儲備四
事捐俸足額尤人所難聽訟惟務化導不事深文
鈎摘有士訟前妻子不孝者曲諭之其人感泣謝
去臨汾洪洞以爭水利案久未結立爲剖斷三年
奏最擢刑部江西司主事遭闖賊之亂間道還里
皇清收定齊魯奉檄赴部除淮安清河縣地瀕黃河無
城郭兵荒之餘殘黎未集加意招徠與民休息
禁旅南征取道供億立辦不傷民力間進諸生講學
未幾入爲兵科給事中出使還

初疏濟寧錢糧私派包賠之弊奉

旨下命撫按總河察勘會用質卒於京邸事寢乙酉丙戌

分校南北闈亦稱得人云

舊志

○楊澤字海若崇正六年舉人賦性孝友冲和博聞
強記由青州府教授遷知陝西盩厔縣阻寇未行
國朝順治初起補江西萬載縣兵火之餘人民荒殘
澤多方招徠寬徭省訟民有一輪明月之謠卒於

任

舊志

○張贊字茂中蚤孤母性嚴贊晨昏必肅衣冠問視
如禮臧獲小失母意贊輒匍匐請罪或涕泣不食

伺母喜跪奉觴七而後退五十餘年如一日中天
啓七年舉人初知大名縣迎母於官持躬蒞民咸
稟慈教流寇陷大名守道朱廷煥不屈死之贊哭
拜辭母率衆出巷戰爲賊所執不屈賊敗舍之西
遁奉母還里順治初起補五臺縣鼎革之後瘠田
汙萊僧衆且半於編戶贊到官僅攜一二僮僕自
甘糲食巡撫申朝紀忽檄下縣索天花百本蓋意
有求於贊也天花產五臺山中寺僧剽取歲不過
十餘本贊不能應朝紀遂誣劾贊及朝紀病死後
撫祝世昌廉其寃值姜瓖叛大同遊騎至五臺世

呂檄贊與新令吳宗協力守備贊設方畧督衆禦
擊城賴以全事聞

賜錙紀錄復原職未補遭內艱歸棲遲林下數年以壽

終

舊志

○黃道寧字爾靜子美猶子也父子淳鎮江教授有
隱德道寧學識通敏爲諸生冠貢成均再試京兆
不售屬

國朝戡定秦晉奉檄赴銓授鄜州州判時兵燹之餘
城郭不完伏莽飄忽道寧招徠遺黎備嘗艱苦流
亡始集乃自免歸生平好學博聞至耄不倦兼精

星歷術數識解超絕能斷大事尋卒以子敬璣貴
贈雲南道監察御史

舊志

○邵士標字仲褒癸未會試中式順治三年殿試成
進士授河間推官理冤疏滯時稱平允熱審清獄
士標洞門縱囚約深秋來歸十八邑囹圄一空至
期咸集無一逸者上官有疑獄輒委之無弗立具
擢山西道監察御史八旗圈地爭訟紛起士標請
據清冊正經界又言計興期近嚴禁弊端喇嘛入
朝已爲造寺懷來又擬興工東便門費以巨萬士
標疏諫又請罷禁旅捕犯人復緝捕舊例以免株

連得

旨皆如所請後以病歸里居鄉恂恂有萬石家風睦族恤

貧行之無倦未及中壽而卒

舊志

○王天眷字龍錫號魯源順治三年進士授行人司行人旋奉使廣東阻兵四載始歸九年使闕里還擢山西道御史出歷江西饒九兵備道山西雁平河東二道皆有聲內轉左右通政宗人府丞康熙十二年以工部左侍郎致仕天眷性孝友撫猶子如已子遇歲凶施粥散財全活甚衆築也園於北郊自號信天翁有夢吟集二卷卒年七十有六崇

祀鄉賢

據詩稿及州冊

按王氏家狀言其兩使安南封王阻兵十二年始歸山左詩鈔及州牘鄉賢冊畧同度之情事未足深信及得其夢吟詩稿自丙戌通籍至癸丑致仕二十八年中閱歷厓畧可得其奉使粵東蓋在丁亥戊子間己丑阻兵居歸善辛卯自粵歸並有詩壬辰使闕里此據闕里志以前六年皆官行人癸巳甲午兩年官御史其信天翁詩云六載皇華使兩年御史驄是也乙未至己亥五年出歷江西山西兩

三爲監司信天翁詩云三遷叨外藩一麾走
西東是也庚子春自河東內升有李黃甲序
可證壬寅六月假歸丁內艱有詩乙巳起復
庚戌辛亥壬子皆在朝明年致仕有癸丑夏
罷官旋里七律二首皆歷歷可數其乙巳後
丙午丁未戊申已酉凡五年未詳然絕無使
安南之說高念東王阮亭序其詩亦但云使
粵東而已又其門人章雲鷺序云余自丙戌
遊先生門未幾先生奉使粵東以兵戈阻絕
羈窮患難凡四年來歸詩益工嗣是先生使

魯還擢臺班兵備江右轉而至於雁平蒲坂
所至盜伏奸革德惠敷施己亥春先生自河
東寄詩集示余云云此又鑿鑿可據初無阻
兵十二年之說恐傳訛既久卽其子孫亦且
數典而忘故特辨之又夢吟稟戊午初度詩
云六旬又七矣則是生於前明神宗壬子而
康熙壬子元旦詩云三度龍墀拜賀春今朝
便是六旬人合之丁卯年所作也園雅會圖
記記附詩稟前自稱七十五老人則是生於癸丑
爲是其卒在作記之次年戊辰秋見夢吟續

集其子獻後序中

○王道新字介公順治三年進士授汝寧推官辛卯
充同考官孟駟煌湯斌並出其門行取福建道御史九年河決荆隆口州之南鄉幾爲澤國道新上
疏云臣鄉山東爲

盛京左臂濟兗東三府爲漕運咽喉大盜盤據多年
黃水瀰漫累歲廬毀田荒民逃物盡藁莽千里誠
有圖繪所不能罄者今

天威遠震賊壘一空河臣拮据多方黃流以塞二子遺
始有更生之望乃淫霖災雹踵至游臻大河汜濫

較之從前尤甚臣讀河臣楊方與撫臣夏玉奏報
諸疏終宵不能寐傷哉赤子田禾蕩沒家室漂流
夫何使之至此極乎此時

國用多端司農告匱請蠲請賑臣子委不忍言但民
既失生何能成賦卽命盡于扑斂人甘于離散究
之積欠積逋終待蠲豁與其需之歲月爲異日之
恩膏何如沛之一朝作及時之雨露臣讀戶部題
覆河南撫臣吳景道舊潦水患未除一疏議將八
年錢糧重災者免額賦十分之五輕災者量免十
分之二業奉有

俞旨豫撫所疏者八年之災故所免者八年之糧免舊祇飽乎胥吏免新始惠及閭閻

聖天子明見萬里所以豫撫朝上疏而夕報可也臣鄉連歲水災不減兩河而寇擾兵臨工煩役重視兩河且過之祈

聖慈勅下該部速行本省撫按崙委廉能監司將被災地方勘實輕重分數比照河南祥符等縣將九年額賦分別蠲免庶災黎之殘命少延而漕運之咽喉得永奠矣疏上奉

旨允行未幾出爲建南道與上官不協告歸道新性友愛

色養不忘人以爲忠孝兩盡云

據墓志

○王宏字青海道明子也順治三年進士授遷安知縣邑當山海孔道軍需旁午儲糗峙芟宏應期集辦又值圈田之役委曲調劑撥補均平民以不擾報最調湖廣攸縣邑民赴都請留者數千人不允宏曰不避險不辭難臣子職也我知叱馭前耳會其叔道新在汝寧便道省之忽見署壁有遷客長沙之句心動數日行至商城發病卒

舊志

○楊宗震字嚴四順治三年進士以例授陝西興安知州州屬寇孽甫靖城郭不完伏莽尙存居民寥

落宗震招徠安輯修堞浚隍守禦漸備士庶始有
固志又躬樹綱紀宣達

朝廷威德疆域寧謐兵民戢睦再知乾州尤多惠政
升工部員外郎督蘆課罷餘羨監寶源局杜侵逋
轉江南驛鹽僉事時裁併道缺管轄通省繁劇倍
昔又江洋適有寇氛宗震督造戰艦晝夜不怠於
民不擾而軍需早備以勞疾卒於官

舊志參
採訪

○魏爾康字蕃錫偉貌豐幹行誼敦篤有文名而晚
達順治三年成進士授固安知縣爾康至邑有逆
璫杜勲卽爲闖賊射書京城者也犯法待理持賄

營脫爾康欲按法誅之璫夤求津要借提訊釋去
爾康以究赦前事罰俸適畿甸圉田爾康留心調
劑申求撥補曲加撫字邑民愛之尋調零陵縣時
初入版圖道路梗塞爾康棲遲江淮數年而歸兄
爾蔭亦有時譽舉孝廉時人號爲當塗二難

舊志

○陳益修字偉如順治三年進士授貴池知縣時江
廣餘孽未靖邑當其衝征調供億甚煩益修拮据
晝夜軍需不闕民亦無擾以最入爲戶部主事司
糧儲會計精當宿弊盡除尋督荊州權關蜀賊盤
踞日久夔峽間商賈絕跡歷年額歲積逋益修設

法招徠撫卹遠近屬至遂盈於背益修質實廉敏
平易近人樂善好施士林目爲誠樸君子任滿還
里病卒

舊志

○黃敬璣字在之號岷雲道寧子少事繼母以孝聞
世居濟寧以曲阜籍登順治四年進士授安慶府
推官廣置學田以贍士山賊竊發單騎撫降之賊
爲感泣行取雲南道御史州有應解臨清德州二
倉米往往派之里下民以爲苦敬璣疏請留州支
放至今便之典試江南名士袁孟義薛坦賈曾陸
壽名顧鼎新等皆出其門旋以終養歸與黃維祺

立敬社集譽髦分題校藝其時科名蟬聯皆造就

之功也

通志叅史
外傳逸

○邱時中字心尼號拙叟居濟寧以滋陽籍登順治十二年進士授儀徵知縣時瘡痍未復至則減徭役革火耗與民休息復煮粥施藥以救饑疫全活者甚衆暇與諸生講藝興學翕然稱化理焉儀徵志稱其端毅明悟作士愛民精於吏治邑無冤民丁內艱服闋補遂溪縣縣三面環海土瘠人貧適有遷民之令力請俟民收夏熟其時徧設墩堡畚鍤繁興曲盡調停民賴以安遷民逋賦盈千於催

科中寓撫字節次報竣以鹽課不足罷職時中篤
于天倫生有異質能視日移時不瞬讀經書惟繹
本文曰聖賢義理原在人心自我求之可耳每說
書弟子潘兆遴曹一鳴手錄爲四書講義三十六

卷

據王天眷撰拙
叟先生墓碑

○楊通久字聖宜士聰子也素尙氣節英敏博學初
與其兩兄薄遊江淮流連山水放逸詩酒間及歸
復理舊業順治十二年成進士每見仕途人跼蹐
囁嚅之態輒心非之乃以母老不出十六年冬始
授直隸獻縣知縣地當南北孔道驛路衝疲而往

來貴遊使命相望多意外需索通久至前令李廷
橋持篆不授竄亂冊籍正額侵沒數千金先期遣
蠹役交結勢要迫通久代爲開銷通久不從廷橋
挾上官頤指授代數恣睢設侮到官僅四十日憤
懣死工科給事中劉大謨劾廷橋求權要私書列
脇狀

上震怒逮廷橋下刑部確訊褫職蠹役長流

舊志

○扈滋字子湛順治十二年進士授濟南教授申嚴
程課分膳以濟貧士升平山知縣地隘民貧多大
姓寄戶滋清正白矢革夙弊弭盜省役會旱禱於

龍井山得雨沾足井舊有神物名大青小青令廉

誠斯見浚至忽出縣人頌焉尋以戇去官

舊志

○袁州佐字左公一字秋水順治十二年進士初授
乾州知州當兵燹之餘民不聊生州佐撫循勞來
遂成樂土丁酉分校秋闈所拔皆知名士十七年
升工部屯田員外郎遷虞衡司郎中明習吏事胥
吏不能售其奸經理貴妃焚帛一事力清乾沒出
爲甘山道僉事地近西海諸部入牧大草灘滿漢
合勦河西舟車不通人以轉輸爲苦州佐悉心運
籌士飽馬騰夷畏威不敢復入民賴以安康熙九

年

詔天下舉藩臬之賢能者以備內陞僅得十人州佐與焉

轉口北道叅議宣鎮土瘠田荒民貧役重倉糈有名無實歲課多逋州佐日夜籌畫勞瘁卒於官有

孝經註解植香齋集奉天志餘及詞集行世

舊志

○黃維祺字五先號洸洲順治十二年進士康熙初

授故城知縣廉正自矢以寬徭役恤刑徒勸農桑

興學校爲務有寡婦饒於資夫從弟欲奪之行賄

千金維祺佯納之庭鞠遽訊曰爾嫂有淫行乎其

人愕然無以答因厲聲曰旣無淫行是節婦也爾

嫂爲爾兄守節爾忍行賄逐之乎出其金謂寡婦
曰以旌汝杖其人逐之合邑稱快時大旱禱雨立
應又大水出隄上居民驚竄維祺衣冠虔禱水旋
退將以才能薦因老病力辭去民泣送者數千人
家居訓後進執經者屢滿年八十三卒之日猶端
坐講家人卦以勗子孫精於易詩有隨記語錄故
城崇祀名宦妻姜氏有孝行見列女據行狀
○楊來鳳字羽伯順治十四年進士授成縣知縣邑
在鹿玉山之陽卽仇池故地也當秦蜀門戶鳥道
蛇盤叢箐邃峒兵燹之遺殘民寥落來鳳和煦慈

惠政簡刑清不弛不擾民以安輯邑舊屬陝撫後隸甘肅甘州途遠解送計簿少遲又不諳新例每被駁斥邑瘠不能應費遂罷去成士民如失父母來鳳博雅多才安貧樂道歸以詩文自娛督訓子姪親知咸成名士更精於醫活人甚衆舊志

○李壯號蠖菴用質子少英敏爲學使施閏章所賞中順治十五年進士授蘓州府推官丁憂服闋改

京山知縣以清慎稱

史外傳逸

○邵士梅字嶧暉順治十六年進士由登州教授升

吳江知縣以清廉稱移疾歸有詩一卷

史外傳逸

○任孔昭字潛夫孔當弟也穎異淵博偉貌修髯居
家以孝友稱里中有徵發徭役不便者輒正色力
請於主者得當而後已值水旱饑饉存臻孔昭倡
率賑濟全活頗衆登順治十八年進士第授四川
太平知縣邑在夔門萬山中兵燹之餘蠶叢萬里
親識多爲危之對曰君命也錦江玉壘其與我有
緣乎未任卒孔昭爲先賢任子七十五世孫康熙
五年具呈禮部復任子祠修舉祀典詳任氏家乘
子之琦之璿之瑞

舊志

○李芳字佳木號順軒曾祖遐齡自洪洞遷濟芳中

順治十八年進士得第後構小樓於城東南隅瓶
月菴左潛心易學幾十年著講義若干卷康熙十
八年知當陽縣兵燹之後凋弊尤甚又山僻藏奸
號難治芳至抑豪強剔奸蠹完城郭嚴保甲集團
練甫兩月而案牘漸稀盜賊斂跡以其餘閒與諸
士論文講學又山縣苦漕輓芳爲請改折民便之
竟陵譚翰林篆比于龔遂之治渤海云以卓異權
知襄陽府忽作銘授二子曰凝天地精奉天地愿
遵前聖謨立當代撰孝友克敦樂善不倦六十年
來俯仰無憾惟願後人率由舊憲其夜無疾而逝

及去民白衣祖奠者百餘里所著有碌碌吟玉山
草玉山初紀行世其易講義藏於家

據家傳及譚
太史所撰壽

序

○陳心澡字秋沆辰誦子也順治十八年進士授浙
江太平知縣縣三面皆海自禁海以來商舶斷絕
貿易不通地復磽薄民多逋賦催科甚艱且外備
飄忽之寇內養防屯之師修戰船築臺寨力役繁
興流亡者衆心澡加意撫循設法招徠又委曲誠
約先完逋欠申豁額外三千餘兩民困少蘓尋以

積勞卒於任

舊志

○劉載寧字允濟號石村其先自故城遷濟州六世有隱德載寧生而沈靜事親以孝聞康熙初由貢生授順天通判歷官刑部郎矜恤平允出爲平越知府山谿叢菁苗民時出剽劫載寧縛其渠魁化以禮讓民賴以安升福建鹽運使以廉潔著調岳常澧道未任卒子四德馨德醞德馥德醇

○劉巖字岱公康熙初由武科爲溫州衛守備未幾棄歸非其好也初巖叔雄於財欲嗣巖巖曰禮不絕大宗堅不肯叔益重之倚托以其家叔歿乃以次子爲之後爲人美鬚髯氣狀疎秀內勁俠而談

論溫雅有承平士夫風故同里名孝廉孫潘與連
姻二劉兄弟與宗盟其餘結納賢豪名士不可勝
數又善畫計不動聲色事立就怨家施大力卒不
能讐有善騾值百千元日踈斃孤貧人於州署前
巖若不聞姑與坐客傳看古刀劍忽起便旋則已
斬騾於踈人所矣悠游八十載姬侍曲部亦極一
時之選云

○潘好讓字允恭號仔菴箕曾孫也康熙十五年進
士知龍川縣當兵火之後邑凋敝俗獷悍善鬪好
讓在官五年捐煩苛興學校民風丕變民舊便食

潮州鹽時更鹽法當食惠州鹽商定價數倍于初
民相率大譁無賴子弟乘之欲爲亂好讓單騎出
諭衆曰若欲反耶當先斷吾頭去民素德令又不
虞其自出也皆叩頭謝不敢乃徐慰遣之力爭於
上官平其價民遂帖服後以病歸少孤依伯兄以
友愛聞授徒三十年從游者衆人樂其善誘云

志

據墓

○王大綸字子言少讀書已棄去好交遊踰弱冠始
勤學受業孫奇逢之門講求大義並古今治亂經
世之學及壯以從軍錄功授廣西按察司照磨

官以其能屢攝州縣事所在有聲在橫州時值吳逆之變兼委司軍事趨機應變老將不如也遷衛輝府經歷以事謁守守方脫冠帶狎優飲酒大綸拂衣去曰官雖卑義不可辱家居以孝友聞

○蘓貞太字雲輔世居蘓吳橋以畊鑿爲業偉軀幹諳韜畧不事生產居恒慷慨曰大丈夫當立功萬里外烏庸是戔戔者爲應募河標左營康熙十七年以百總調發征臺灣將軍楊某壯其貌授以領旗把總十九年二月隨師進勦烏嶼海倉等處復攻克陳州馬州灣腰樹獅子口觀音山石馬等一

十九寨取廈門金門諸島恢復海澄貞太每先登
議敘准以功加左都督管中營副將兼右營遊擊
事撫恤軍民正己率屬閩人爭頌之後缺裁改選
廣東廣海寨遊擊以病歸卒於里孫某江南十河
營守備曾孫學讓汀漳鎮總兵

○費成啓以行伍隸總河軍門康熙十八年調發福
建隨昭武將軍討鄭芝龍連破獅子石馬等一十
九寨賊保海澄圍之成啓先登芝龍逸乘勝克廈
門捷聞

特加恩封正一品榮祿大夫功加左都督追封四代二十

二年授閩安鎮遊擊四十二年以湖廣臨武藍山營叅將致仕

○白道隆字未詳與貞太成啟同調赴福建昭武麾下屢立奇勲授守備功加左都督歷官廣西右翼浙江杭州漢軍左翼副都統五十七年扈

蹕熱河以老病乞休子汝霖廕生官至順天府治中按同時赴調獲功者有十八人惜僅得蘓貞太三人而費白二人事迹亦不甚詳姑據其履歷冊及劄付爲敘次如此

○潘應賓字鑾客號雪石又號東岑箕之元孫也父

好儉見孝義應賓中康熙十八年進士入翰林授
檢討二十二年初試翰詹諸臣于保和殿凡八十
二人應賓在高第明年充會試同考官與修一統
志明史三十三年從

幸豐澤園試豐澤園賦及理學真偽論稱

旨旋入直南書房四十四年以侍講學士乞假歸卒於里

應賓事親盡色養建義倉宗祠率先爲倡急師友

難人服其孝義云

據誌狀

○任之璿字子睿孔昭子也由貢生任廣東布政司
經歷立身居官以清正自持上官異之詢知爲賢

裔刮目敬禮稱爲東魯翹士廣東鄉試卷例許舉
子自填經貫用經歷司印榜發報部有舉子擅改
經書中式者罪及印卷官致鐫級調用上官欲留
之璿力辭歸卒於道

兗州府志

○李楨字瑞公號彤墀以易孫也康熙十八年與父
澄同舉於鄉二十一年成進士授玉田知縣邑本
畿輔要地田畝半隸旗籍楨至裁以法豪橫歛跡
興學校鼓舞士類邑有還鄉河歲爲民患力請於
上官修築挑濬患乃息時軍興供億旁午楨指揮
經營輓輸無缺以卓異授刑部主事遷員外郎庚

辰充會試提調官尋以主客司郎中被吏議歸教授鄉里安貧樂道優游林泉有長者風

○潘兆遴字恬公卽以恬名其菴故人以恬菴號之士良遺腹子也九歲能文康熙二十九年舉順天鄉試授天長知縣揭一聯於座云最近人情偏執法但循天理不沽名謂書言弗違道以千百姓之譽明乎非違道不足以干譽也道不可違則名豈可干乎歷旰昃泗州皆有善政痛生不見父睹手澤卽泣顏其居曰寶澤凡尺牘隻字皆謹藏之爰著知非瑣言若干卷於先世之詔言嗜好祠墓遺

編親懿師友一物一器皆追記之兄弟友愛始終
不析產少從學邱時中口授四書講義刻於天長
好金石作分省金石記又以張弢濟州學碑釋文
與顧藹共訂付梓他所著如正譌雜記之類尙多
嘗夢手握一草覺後大悟以夢草名其堂曰今以
夢草名吾之堂吾堂吾身轉瞬亦草耳年六十一
自爲墓志并銘又六年而卒

據墓志
拓本

○張爲經字涵六生而穎異性孝友仁厚鄉黨皆重
之康熙三十年成進士授桂東知縣禁溺女除火
耗却餽遺誅豪強廣教化邑民暨獠獠戴之如慈

父行取吏部主事累官至稽勲司郎中五十年充
廣東鄉試正主考尋提督福建學政漳浦蔡世遠
稱其廉慎居心清公自矢所取文必依經據史本
領充厚而義蘊深者公明二字實兼有之平生著
述甚富有漚水學吟粵東題詠公餘偶興按土草
學政全書等集行世崇祀桂東名宦其去閩也閩
人亦立祠祀之爲經歿貸帑金不能償閩諸生爲
輸金代償大吏奏充閩省兵餉弟爲綸字公綽
貢生幼有夙慧過目成誦與兄稱雙壁年三十餘
以諸生終人惜之

○楊拔茂號毓延賢之曾孫也少英敏補弟子員歷試皆高第循例應異材超等之選康熙三十七年授恭城知縣母病篤率兩弟毓盛毓章同赴城隍神願以身代母病旋愈丁卯壬申洊饑捐貲以賑

全活甚衆

史外傳逸

○李濂字源洙由運學拔貢生舉康熙三十八年順天鄉試授雲南廣通令時值天旱祈禱立應旋丁內艱改補上猶縣革除一切陋規里民歡頌邑有劉萬達族居盧王峒窩盜于萬山中每殺人縛巨石投潭底或有覺者卽統衆撲殺之並焚室以滅

其迹濂訪得實往捕之無敢証者而被害之戶又
不可得乃製文祭潭尸自水出案始定居民因建
祠潭上以誌其異尋以卓薦由主事出知平定州
甫蒞任卽革牙行朋充帖銀等弊并鹽課錢三千
貫邑有娘子關地高苦旱而上游之水爲神武衛
所據濂請于上官捐貲自山上作引水具鑿池蓄
水田成膏沃又於州境之三十里鋪作池以灌田
至今均受其利擢潮州知府署惠潮道事告歸卒
於家平定人立祠祀之春秋報賽特盛

○張如緒字紹先康熙三十九年進士授內閣中書

纂修三朝國史四十七年典湖廣鄉試旋授戶部
福建司主事後升禮部主客司郎中以父世思百
歲告終養召見并

賜家居得具奏摺附 聞世思起居時人以爲榮旋丁艱
服闋補禮部祠祭司郎中年七十五致仕又十五
年而卒如緒以孝弟任恤稱於鄉里而居官清慎
父子享大年人以爲實備五福云

○王璉字宗彝康熙四十二年武進士以二甲第一
選侍衛出爲杭州撫標遊擊升樂清副將地邊海
鹽販爲奸往來叵測璉整營伍剔積弊軍民肅然

署溫州鎮總兵以疾乞休優游林下二十餘年卒
○李燦字馥郁號能白其先趙郡人曾祖艾以避流
寇來濟燦生有異兆讀書聰穎下筆成章倜儻好
騎射康熙四十二年成進士入宿衛尋以父艱給
假逾年授浙江象山營都司遷提標左營遊擊會
鄭盡心陳尙義餘氛未靖從提督王世臣會兵海
上討之賊平議敘歷提標中軍叅將升瑞安副將
整飭有方禁漁船陋規沿海漁人頌之調杭州城
守副將雍正初以薦入覲

對試騎射稱

旨賜金回任雍正三年署黃巖鎮總兵躬入海島相度形勢與巡撫會題設立文武員弁列汛屯兵海疆安堵六年授溫州鎮總兵仍移鎮黃巖捐穀置義倉每歲出陳易新以時賞卹軍中感之八年調江南

崇明鎮入覲

賜花翎貂帽克食等物贈祖父如其官尋權攝浙江總督事兼理鹽政以劾貪鋤暴爲先政而性亮直經其簡斥者恒無怨心築老鹽倉海塘至今賴之後巡撫程元章以其曾攝鹽政屬爲代理燦正本清源恤竈優商私販自絕十三年授浙江提督仿戚繼

光遺意爲鴛鴦陣法旌旗壁壘見者咸以爲臨淮
家法監試武闈甄拔金華朱秋魁等號爲得士後
秋魁果以第一人及第云公餘時與諸名士觴咏
如邵總憲基蔣吉士拭之皆稱莫逆交歲暮以廉
俸之餘送學資諸生膏火前後在浙三十餘年風
裁嚴峻不能容人過然胸無城府其人能改輒如
故家居友愛以遺產歸兄家事一聽主持晚年迎
至署與同卧起喟然嘆曰此東坡彭城風雨之夕
也卒年六十一蒙

恩諭祭子遵湯候補州同孫承鄴蔭生現任山西按察

使據墓志

○王琮字公玉歲貢生康熙四十四年任泰安州訓導端方敦厚教士以立品爲先修鄉賢祠振作士

氣州人勒石頌之

泰安縣志

○王大綬字子佩家貧業漁以佐甘旨弱冠習騎射研精韜畧中康熙四十八年武進士選侍衛初授廣昌守備歷泗城副將時土司不法制府欲議剿大綬往諭以利害開明大義遂感服謝過竟賴以全被吏議旋起官至開化總兵雖顯貴不異寒素於官署臨池築一亭垂釣吟咏其間名其詩曰竿

頭集

○趙蕃字蓉水號松存昌黎教諭資之後康熙四十八年進士授潁上知縣有叔殺其姪者叔與爲從者皆死當事欲坐叔之二子蕃力持不可乃已居官慈惠於盜賊獨不少寬縱問則與諸生講經義不倦潁上地瘠農事亦鹵莽蕃親至田間察勤惰爲賞罰民自是多蓋藏攝霍邱及潁州事健訟者不敢欺丁父憂民將訴於大吏留任守制蕃追止之送者數千人雍正初

特簡命監定州武強等賑補靜海知縣前令以賑被斥有

虛戶米五千餘石吏謂此可中飽蕃築堤代賑又別以鈐記戶口小帖給老弱者盡其米而止升天津直隸州請借米活饑民無算以性直被議有官累未能去居北門從學者甚衆多所成就數歲乃歸年八十餘卒子司諫歲貢生司講司論皆舉人孫維翰進士饒陽知縣

○戴文謨字佑純先世山陽人姓龍明初有爲後於登州戴氏者世襲千戶永樂初遷遼東蓋州衛文謨祖淮徐道聖聰始居濟寧文謨中康熙五十年舉人初授湖南永興知縣時大逆曾靜居縣治之

蒲塘事覺有武弁以兵猝至人情汹汹文謨不動
聲色親入山搜獲之有馬彩玉者與兄共私一婦
彩玉妬殺其兄於姦婦門外婦亦不知也彩玉反
告求伸文謨解彩玉衣驗之血迹殷然彩玉不能
辯案遂定又徐氏被盜十餘載未獲文謨至盜首
戚十七率夥投案云素服公清正不忍貽累也改
調永明撫綏苗民風俗丕變乾隆元年行取授刑
部主事旋以疾歸所著有尊聞錄藏於家

○王煥字堯文貢生教習授彭縣知縣凡十年調成
都去任之日百姓攀轅哭送五十里爲立去思碑

張延慶字燕翼爲經子康熙五十一年進士授湖北潛江知縣驛中芻粟向取諸里甲而薄其值民不勝病延慶下車立除之邑素苦潦爲宣示修築法盡力督之遂無水患歲歉捐私財糴米三千餘石助賑由是士民爭先出粟存活甚衆先後兼攝沔陽荊門二州天門江陵二縣事所至有聲擢荊州府同知去之日民泣送者數萬人曾兩攝府事有奸民詭冒山鄉地以勢脅監司者縛其魁而事定攝德安府舊案充棟率牧令鞠之逾月一清歸田後杜門謝客惠周鄉黨雖貧而施予不倦子淑

齡淑軒皆舉人淑渠進士知潞安府

○劉世臣字殿弼父貴河標中營守備世臣自幼膽畧過人康熙五十三年中武闈鄉試歷官本州城守營都司舊無部印世臣始申請頒發又請添設馬兵上元放燈有乘間爲變者世臣率士巡徼遂不敢發奉

旨獎勵後升河標右營遊擊歷廣東提標叅將卒官同僚文武及士庶歸其喪

○喬世臣字丹葵號蓼圃先世自泗水遷濟父發七歲能文年十四補弟子員懷才不售有隱德金壇

王澍表其墓所謂菊農先生者也世臣中康熙六十年進士改庶吉士雍正初授編修充明史纂修官旋改吏部郎中奉

命賑饑武清值輸粟不繼饑者囂然以便宜借穀給之

世宗皇帝以爲能晉階二級出知嘉興府調杭州累遷浙江江蘓按察使所至有惠政而聰辨強毅發奸摘伏不可髮舉民以爲神九年晉右通政升江蘓巡撫江蘓備儲倉糧較各省少乃奏請大小中縣皆令積貯米穀出陳易新以足民食京口駐防兵向領餉於蘓州藩庫相距稍遠請撥八旗倉米折價

銀二萬兩存鎮江府庫以備不時又以各省提鎮駐劄地方多有與會城隔遠者請計兵多少存銀寄相近府縣庫支發並得

旨報可晉都察院右僉都御史築松江海塘自華家角至寶山皆易土以石至今賴之十二年升刑部侍郎兼工部卒生平不沽名不市恩門無私謁家無餘貲子大元大凱大凱自有傳據墓志

○陳璵字殿賓心澡曾孫也雍正五年例舉才行兼優之士巡撫岳濬以理薦明年

召試太和殿條奏滾單及科場事宜悉蒙

前允下直省通行授萬年知縣邑有桃源十八洞爲賊淵
數塏嚴保甲巡緝勿懈民慶安堵收漕豁除浮糧
六百餘石水脚六百餘兩有吳姓兄弟互爭墳山
至十餘載曉以大義吳爲泣服願以所爭地歸公
又叛逆傅秀山案牽織本邑邵姓多人悉爲開釋
會勘樂平餘干等縣獄有神君之目捐俸廉倡修
文廟每月朔望集士訓課文風丕振甲科聯起庶
常聶位中今泐河同知胡增前本州州同鍾華悉
其所造士也尋以循卓薦而塏病卒士民勒石以
誌遺愛云

○潘質厚字德載雍正四年舉人乾隆四年會試以明通榜授高密縣教諭振興學校及門承指示受業登甲科者六人以俸滿保舉

特簡福建壽寧縣知縣抑強扶弱奸宄斂跡夜不閉戶囹圄空虛邑大治十二年金川用兵曾自請效力會已平乃止後移疾歸結茅寧陽龜鶴二山之間足不入城教授生徒及門甚衆張淑渠靳宗著皆其弟子也

○孫鏡字寶三景燿從孫父堪以舉人爲浙川令有聲考選御史鏡於雍正六年以人才薦舉歷知

廣桃源瀘溪縣瀘溪有地爲苗所侵百姓累無地之賦者百餘年矣鏡申請清理上官恐生事不許鏡具文達部得

旨設法辦理單騎入苗寨以理論之苗感其誠竟得地而還偶道出桃源有韓元泣愬云幼聘某氏女被豪民強委禽訟之官豪謬引媒氏爲証官竟不直元公仁明舊父母也故以告鏡以不在其位爲辭元痛哭不得已爲言於後令令深護前失鏡聞之上官請會勘以女歸韓氏用所乘輿送之時監司亦按部至鏡失於郊迎監司甚愠及至館知其故大

喜爲賦催粧詩人傳以爲佳話云終以不合於時

謝病歸

據行狀

○孫鈞字陶仲鏡之弟也幼岐嶷貌豐偉弱冠補諸生貢入成均教習內廷發江南以知縣試用歷揚州府通判宿虹同知升淮揚道凡賑饑禁暴於漕鹽諸務靡不盡心以河庫道三護河督印務監試棘闈一秉至公調江安糧道剔奸除弊並以能稱年八十五卒於家季子濟字達夫嗜學好古從金壇蔣衡問書法遂精其業風神骨力得二王遺意又善畫及詩循例爲南城正指揮以廉能稱

強禦公暇不廢書卷以終養告歸築室漁山因號
漁巔門無雜賓與二三故舊研求書畫日摹帖千
餘字以爲常卒年六十二其筆墨爲人所珍云

○許弼乾字紫垣以歲貢爲平原訓導教士有法入
敬服之舊俗刈麥時男女相率拾遺秉滯穗以爲
常後則公然攘奪不以爲怪言於邑令嚴禁之已
復乘間爲之開導勸諭其風遂息由是令有事必
諮訪凡修邑志及科歲試童子筆削去取高下言
無不從有豪右具重幣以他事屬以請托弼乾曰
若如此令將不我信矣其人慙而退後以疾歸弼

乾天性孝友樂道人善自處以約亦號檢齋子弟
無敢以矜誇浮靡相尚者論事平易近情爲經義
有先輩風乾隆二十五年卒年八十有七

○種尙賓字嘉士先世自洪洞遷濟幼饒才畧遇事
卓然有定識張學使爲經深器之以爲濟世才也
以女妻之例授江西餘干丞邑人素健訟間有待
決於丞者冰兢自持人不敢干以私以母老請養
家居三十年敦宗睦族濟難解紛爲士庶所推重
○史大倫字純舒其先溧陽人明末遷濟世有隱德
大倫年十八補博士弟子員貢入監以例授戶部

廣西司員外郎監督錢法清介不苟鼓鑄得宜旋
補工部製造庫郎中與李衛喬世臣同以才名著
怡邸及張伯行交章薦之晚年優游林泉效香山
遺事結南池十友舉鄉飲大賓年七十五卒

○呂九如字天保侍衛浩子也生而英毅豐頤廣額
眸炯炯有光弱冠補弟子員善書畫入逸品不屑
經生家業遂棄青衿戮力戎行由浙入閩時臺灣
不靖身先士卒斬首十數級懸之纛全師奏凱拔
補守備入覲

世宗憲皇帝見而奇之謂閣臣曰逼真彌勒佛也補福建

左營遊擊歷雲南楚姚鎮總兵乾隆六年陞見復
有福將之目

賜御馬孔雀翎調普洱署狼山遷開化四膺大鎮所到
之處兵輯民安年四十五卒於官囊無餘貲同官
歸其喪

賜祭葬如例

○尹士偃字子元號東泉附貢生歷興化福州邵武
府通判八年舉卓異第一升臺灣海防捕盜同知
駐防鹿耳門海口十年北路彰化縣有土官林武
力鈞通生番擾動南路鳳山縣奸民吳福生中路

臺灣縣奇崙番乘明竊發時大兵進勦士佥從總
兵呂某獨當中南二路大小一十六戰事平調淡
水同知叅水陸軍務十一年以奏績軍功一等俸
滿例升內地上官以海疆初平非士佥莫任遂補
臺灣府知府旋升臺灣道四年內調民爲建祠焉
任襄鄖道以臺灣承修戰船未竣復赴閩催辦病
卒年五十二百姓聞之航海來哭者不可數計

○劉栢字蒼巖父汶奉

旨居濟寧栢仍以順天籍中雍正二年舉人明年試中書
第一授岢嵐知州奏對時

世宗憲皇帝出陳言一冊曰此汝父所撰其勉述遺意以副朕望栢感激涕零居官清勤歷山東登萊道未幾遷安徽按察使復

命總理北路營餉軍務加布政使銜以勞卒於京師栢粹資勤學老不釋卷尤工吟咏居憂有哀慕詩出塞爲塞外吟忠孝之性溢於辭表平生言論丰采輝映四座凡遇大事應機立斷雖馭歷遠邇致位二品而人常以爲未竟厥施云

○王元樞字斗南號書門先世以貲雄鄉里元樞身長戍削目閃閃如電豁達任俠急人難傾囊不顧

也好經世之畧尤工詩每夜半獨起高歌聲厲而
哀妻孥掩耳弗忍聽遊吳越載書一舟酒一舟眺
覽江山結納豪傑興至痛飲旁若無人年三十產
日落雍正七年循例爲乳源知縣時山獠擾曲江
英德間制府委元樞協二縣捕之有柳坑水源宮
最爲險峻元樞募驍勇分道進剿手一矛徒步率
健兒數十直抵其巢獠望風潰投崖死者無算乃
遣獠練傳示曰自首者許以自新果各縛其魁以
獻事平擢知羅定州調嘉應歷肇慶府嘗夜乘小
輿從一僮廵街市暗識諸無賴不法者詰朝重治

之於是各歛迹無敢犯升海南副使道以辦銅虛
帑落職留滯十年卒於粵元樞雖失意寓蕭寺縱
觀古書丹黃不輟論古今學術治績及邊塞洋舶
利害風發泉湧晚益工書求者填戶時聳肩苦吟
或竟日一篇或三四日不成篇不洽意者棄之又
輒大言不願爲詩人也所存有書門山人詩二卷
戊辰春夏草一卷子伯嵎幼聰慧性篤孝隨父喪
在外不就試久之持喪歸試卽冠其曹旋往迎其
母途中得疾甫至家卒

○戴仁行字揆卜曾祖流見文苑仁行雍正八年進

士知荆溪儀徵二縣多惠政移福泉邑號難治惟以忠信慈惠臨之民胥悅服在職八年三入鄉闈得士如莊學和楊大琛虞鳴球皆名下士乾隆六年行取主事緣目疾歸里教授生徒出門牆者多達士

○楊名案字熙載號檢齋八歲而孤初就塾日誦千言筆耕以供母甘旨必豐雍正十一年成進士授永淳知縣乾隆四年丁內艱念母氏旌坊未建至是用數千金成之服闋發往貴州歷開泰永從龍里三縣攝開州事所至有聲永淳獮民每三月節

男女以踏歌野合乃曉以廉耻至有因戲言而羞憤死者在龍里擇苗民俊秀入書院有許生頗知文義旋補弟子員一時稱爲青苗許生後因事去

官卒於家

據墓誌

○邱仰文字襄周以滋陽籍中雍正十一年進士爲四川定遠縣知縣調南充丁外艱起補陝西保安縣乾隆十九年移疾歸在定遠時力行保甲法以清盜源蜀中有所謂囑嚕子者匪類之總名也素爲民害仰文令村落自爲保伍遇有六七成羣橫行鄉里者衆共擊之置朱梃分授里閭大書其上

曰專打嚙嚙子又條陳治嚙嚙狀上於制府制府
下其法於他州縣至今不廢有羅九飛者人誣以
爲盜積年不決仰文至白其寃立出之人稱神明
調南充時以父老乞終養陳情之書三上不得請
其文在集中人比之李令伯家居二十餘年足不
入城市著省齋自存草碩松堂讀易記楚辭韻解
行世又有讀易舉義別記春秋集義未成書四十
二年無病卒年八十二

據行狀

○黃孫懋字訓昭號忝齋維祺孫籍曲阜乾隆元年
舉進士第二人及第累官至內閣學士禮部侍郎

性靜穆深沉不苟言笑衣冠整肅雖盛暑不懈少
從同郡劉汶潘冲浪遊博覽不爲章句學工書法
會爲

皇子傳繩以世子法

皇子曰如黃師傅爲人安得不令人起敬四年充會
試同考官所得士若莊有恭官獻瑤趙德昌皆當
時名士侍直

內廷凡六年或有以清要缺出令之圖謀者孫懋曰
官可圖耶笑謝之九年奔祖母喪得疾卒於家

據墓

志行

○仲永檀字樂園號襄溪先賢仲子裔性英邁善讀書經籍寓目卽能窺其根柢乾隆元年進士改庶吉士授檢討三年典試湖北五年改監察御史劾提督某受賄欸跡

上嘉其直擢僉都御史中外凜然晉副都御史七年充會試副考官稱得人尋往貴州會勘王士俊案平反得情復查江南賑務甫出都以先言事被逮尋卒貧不能具棺門人醵金歛之葬橫坊村東

○林之舊字素園號梅村以湖北孝感籍官武邑知縣少奇貧出游四方久客黃州多依幕舍有存草

堂集子興濟登乾隆四年進士第改庶吉士尋卒

據山左

詩鈔

○高居寧字靜菴家貧嗜學淡泊自甘讀書倣分年
讀書法循序漸進日不暇夜必補之乾隆十年成
進士授會稽知縣政尙平恕以寬徭省刑爲要杜
絕干謁公餘集士子課文評其甲乙旋以病謝職
病痊起用未及補官而卒歸之日行李蕭然蕭山
訓導秀水朱坤爲作德政碑記

○李鍾栢字丕承號文峯生十三歲而孤事母以孝
聞乾隆八年循例爲泉州府通判旋攝同知事八

防廈門地濱海盜賊出沒又奸吏舞文糧則
飛灑隱匿頗爲民蠹鍾栢按黃冊親爲校核釐奸
剔弊凡決斷初不留獄一年大治以餘閒遊憩山
水存問父老益知其疾苦及風俗美惡並詳記之
後以養親告次蘓州以病卒子都桂貢生孫五人
容戶部郎中濶刑部員外

○劉廷掄字殿籲年十六補弟子員學使大賞器曰
劉生他日福壽未可量乾隆初以例貢爲邱縣教
諭訓士有法歲禮諸生來謁者或無完衣却其贊
且周之有李生爲仇所陷言於邑令出之凡折兌

地丁稅學校官例得與聞心疑書吏喝報缺數過多手取一封權之數且浮作曰教官非欲與令爲難獨不念銖兩悉民之脂膏乎令謝之自後不敢加耗頌聲載道廷掄爲曉諭歸美於令令大敬服嘗攝縣事歲大饑先捐金以賑爲富民先然後申報上官方欲列薦剡廷掄心忽動假應省試枉道省親而父已病革矣丁外艱從此奉母不出留意汜勝之法及齊民要術書以勤儉治家里中有舉無不應年八十卒以子珪貴晉秩四品果符壽之語云

○靳宗著字叶兩翰林待詔秉瑞孫乾隆六年舉人授浮山知縣被議改補宣城民范大振以姦殺汪秀書支解投水中久不知主名宗著潛訪得其實大振伏辜人以爲神再任休寧邑多富商大賈宗著至苞苴不行復得蠹役萬廷美豪右李國儒諸不法重懲之士民稱快調桐城送者以萬計丈量蘆洲革一切陋弊聽斷無留牘世家閱閱無敢干以私上官倚重有疑獄每委決焉庚辰戊子分校得士仲嘉德爲江左名解元三十五年以卓異入都道過里門卒

○王繩祖字嶧亭年十三通五經大義乾隆十八年二十四年兩中副榜爲樂安教諭倡修學校朔望具饌集諸生校藝文風聿起三十一年升授黃梅知縣縣數患水繩祖勘災申請賑卹巡撫以非時難之再三請得借長平并勸富民輸穀民以不饑鄰邑有強力聚衆者鄰以反狀聞繩祖馳往曉以大義縛其魁衆乃散縣濱江長堤如綫相度形勢繪圖請動帑興築不果調漢陽而黃梅又以水告制府定長以詢繩祖乃檢前所上圖說入告奉

旨如所請凡與黃梅接壤州縣皆蒙其惠攝漢陽府同

知以風烈著上官胥吏衙蠹皆歛跡有舟人劉雲
宗疑妻與鄰舟曾與國奸致妻投江死曾坐逮獄
繩祖訪獲淘摸兒詢得其情曾乃得釋又有魏國
明者追逐吳文斗傷其脊適吳啓泰踵至又擊仆
之而不當致命處翼日文斗死知府泥後下手條
例判吳罪繩祖以致命傷坐國明爲固爭不得按
司親鞠之從其議時大軍進勦緬匪芻茭之需每
取給漢陽繩祖多方籌畫事集而民不擾以勞卒
官年三十七弟純祖字秉謙七歲能詩十三補州
學生屢試第一中三十年舉人明年春赴禮部卷

燬於火

召至圓明園覆試以額定被放秋省題江南得疾卒與
兄繩祖並以文才著濟上繩祖著有鳧繹瑰琅等
集若干卷純祖有學古編及古今詩十四卷並藏
於家

○喬大凱字恬齋世臣子也於書無所不窺博學淹
貫下筆千言立就早歲著有松山集詩二卷梅月
集詩餘二卷及壯悔其少作謂無當於身心性命
之學遂肆力於易苦心探索幾二十載著有周易
觀瀾若干卷言理多本程朱言象參用來知德諸

儒論說有舊說未安者必澀精瘁神務悉其所以
然故其書每發先儒所未發時謂五百年來無此
作也乾隆十八年舉於鄉明年中明通榜三十一
年夏奉

旨簡發直隸以知縣試用總督方觀承知其經學甚重
之八月署平鄉縣知縣縣民路珍濟毒殺兄而控
其嫂嫂誣服凱一訊知其枉窮竟事情具得珍濟
殺兄狀並獲所藏毒器珍濟遂服辜郡守耿壽平
嘆曰老吏不如也三十二年題授東明縣時征緬
甸軍需旁午東明奉檄出車馬協鄰邑糧芻所需

有不准銷者一一予值俸入不足繼以稱貸絲毫
不累里民東明格於例受代去旋奉

旨以兵丁經過不能不藉民力發帑金數十萬賞賚獨
東明民不受曰秋毫皆出喬公俸錢民何力之有
後令言其狀上官益重之題授武強縣知縣疾作
猶力起視事或勸少休則曰吾一日不致仕則一
日不可尸位逾數月卒士民悲慟送者填於衢大
凱生世胄而儉素倍寒士讀書外不與他事持身
端謹一言一動循循莫不有規矩教授生徒最以
窮經勵行毋徒拾青紫爲稽古榮故遊其門者

所成就進士張有年舉人蔣傳馨李紹沆謝蘊田
熊本源貢生李元善生員高如岱皆及門也主上
黨書院講席受業生掇科第者指不勝屈乾隆三
十九年大吏以凱所著周易觀瀾應

詔送四庫館予三長懷祖選拔貢生現任禹城縣教諭
次述祖繩祖皆廩膳生員

○時祖濂字滌九乾隆二十四年中式副榜初任昌
邑縣教諭勤於課士士爭歸之以例爲中書科中
書出知廣西河池州多惠政調西隆以吏議落職
起知四川蓬州時征兩金川戮力軍營身入險阻

不避勞瘁以火災卒於軍

○宗望先字顯揚金鄉人明季土寇擄掠與弟光先族弟環率衆結柵以禦之賊不敢近邑令廉其能請于憲司給總練職順治初西賊猖獗縣尉引兵勦之爲所圍望先聞難馳馬奮稍直奔賊陣環與光先督衆從之呼聲動天地皆以一當百賊驚大潰生擒渠魁以歸後屯兵柳林河陰賊畏其威無

敢渡河者

兗州府志

○趙永吉字長山金鄉人少倜儻勇力絕倫康熙初耿逆煽惑溫台間永吉隨大軍入閩以驍勇善戰授守備嗣攻取漸山奮勇入賊壘所向披靡乘勝

追逐連破十九寨縛其渠魁論功授左都督補南昌鎮遊擊時江西妖賊袁大相等聚山峇謀逆吉諜知之率家丁數人突入其窟生擒爲首者七人餘衆悉平事聞陞饒州副將尋調陝西花馬池副將署總兵事多惠政後卒于官

○楊淮字維揚金鄉人康熙六年進士授內閣中書舍人甲寅吳逆王師南下淮佐戎事數畫策戰屢有功尋以父母年老告歸終養數年卒

○張霖字仲澍金鄉人康熙九年進士授石門令時勦除逆藩石門當其衝霖辦運芻粟餉不乏而

不擾賊平招撫流亡革除積弊後內擢銓曹歷任文選司員外郎致仕歸以壽終

○李振璣字正桓金鄉人康熙三十年進士初仕新河再任贛縣又移宰五河所至皆有循聲而五河爲最邑苦卑瘠加以淮水偶漲秋禾輒被水璣請賑請蠲不遺餘力民甚感之後歸里卒

○薛喬昌字鴻緒金鄉人康熙四十二年進士謁選得景寧革火葬溺女之俗慎選鄉飲大賓以風厲之又創建義塾署慶元慶之糧額混淆書吏之手廿餘年喬昌釐剔一清復署雲和旋調慶元行取

吏部稽勳司主事歷文選司歸卒年七十二

○周一德字克協金鄉人康熙四十二年進士授二等侍衛歷衡州副將雍正五年守彝陵鎮時容美土司淫虐土人訴于制府一德言容美性悍據險未可驟取先招桑植保順永靖諸土司就撫決其藩籬彼自胆落遂檄一德鎮九谿一德領健卒據白岩洞召桑植諸管旗土把賚以酒肉令爲前導土司拒命一德諜知有伏波祠前銅柱高丈餘入土僅尺有半無敢撫摩者因紿之曰伏波遺記云今年某月日銅柱倒土歸流因舉手撼之應手仆

土人驚駭皆遵約束遂由長陽趨容美其酋白縊
因其地置永順府保靖等縣明年晉鎮寧鎮兵與
辰沅道王其征六里諸苗王欲由上龍潭進一德
以地險攻之未可猝下引兵進鴟溪溪有三楊廟
苗奉之謹門數十年不敢開有事惟門外設祭一
德使人潛入誌其神狀貌見坐三纛尙完好乃宣
言神見夢作何狀貌稱

天子聖德汪洋願領苗歸化畀我三纛抗不服者勦之
遂斬牛設供啟而入取三纛歸營尙光彩曜日苗
民驚駭遂降抵上龍潭禽其黨置之法築城于吉

多坪舊有井日三潮響如雷旁井建三神廟歸三
纛廟中自後井潮日僅一至響亦衰矣八年充領
勇健營左翼鎮九年赴莊浪爲總統提督出巴里
坤所向有功乾隆初調川北鎮旋以原品致仕著
火龍陣總論得兵法奧旨

縣志

○張元善字魁立金鄉貢生舉賢良方正初任浙江
開化丞歷署昌化長興海鹽縣令有積年大獄株
連者數日卽爲開釋例擢府丞署重慶府事以失
察被議歸卒年七十子掄甲徐州同知孫隆基舉

人見選舉

按縣志選舉又作
張誠基與傳不合

吳衷一嘉祥人順治六年進士知漢陽縣設

除行稅爲楚北循良第一以病歸卒祀鄉賢

竟州府志

張維賢嘉祥人以恩貢任杭州府通判多惠政民

建祠祀之擢江寧府同知卒祀鄉賢

○黃繼祖嘉祥人制行端方由貢生知湖廣常寧縣

邑徭民雜處素號難治繼祖察民隱決疑獄置學

田修文廟惠政卓卓有神君慈母之頌尋以疾告

歸優游林下士論高之

○劉芳聲字茂遠魚臺人順治三年進士由主事累

官鞏昌知府招流移勸開墾繕城賑饑羨績甚著

尋陞桂林道赴任便道省親適其父病篤將屬纊而芳聲至其父復甦執手留連越日乃逝人以爲純孝之感服闋補貴州畢節道改平大縣威守道以裁缺歸居鄉三十餘年設義學施藥餌鄉族多蒙其惠卒祀鄉賢

○段化龍字霖生魚臺人順治三年舉人已考授推官改選知縣生平孝友克敦高才善下秋闈時同考官劉某倦卧夢朱衣者呼曰予山陽人也如是者再因驚寤細爲檢閱得數佳卷意必有山陽者陰德者及榜發無山陽人乃悟魚臺改屬山陽

也詢知化龍孝友天成甚爲嗟賞

○曹斌字二允魚臺人初岐嶷多勇畧中順治六年進士授嶺南守脩勦除叛逆招撫流亡以功累升定海鎮遊擊督修戰船刻期竣工督鎮咸嘉其能後因勞瘁成疾致仕歸卒年七十有六

○夏騰高魚臺人順治壬辰拔貢生任孝豐知縣

大兵下閩浙供應紛煩騰高區處有方閭閻帖然以文學選預鄉試分校土寇猝入境試竣潛歸隨地控禦境內以寧豐邑賦役徃例每多滋累高爲更例民情大安歲荒亟請發賑又遷學建署累著治

績

○劉廣譽字令聞魚臺人家貧常拾遺穗以養其親
明末流寇充斥廣譽奉父避江陵傭於書肆寇平
北還銳志讀書順治十二年成進士任六合令後
卒於官旅櫬不能歸士民感其惠歛錢贈之

○謝遴字秉衡魚臺人順治十八年進士授上蔡令
居官清慎士民愛之已酉分闈校士以得人稱後
內擢京職蔡人攀轅泣留者百里不絕

○劉澄字元襄魚臺人芳聲長子由恩貢官湖州府
同知懲奸除暴境內帖然升寧波知府時巡撫疏

濬嘉興河道澄指畫了了遂以委之數月河治而
民不擾嘗歷署象山歸安烏程皆有聲卒祀鄉賢

河内縣志

卷之三

濟寧直隸州志卷二十六

人物四

儒林

通乎天地人之爲儒不愧於名教之爲儒而史
傳凡學有師承著述有補於經傳者皆謂之儒
林然如北齊熊安生聞周師至令家人掃門曰
周主重道尊儒必將見我噫儒風至此已掃地
矣又何道之足云魏應何休等或經明行修或
忠言讜論或守志高潔至曾壽之崇正斥邪卒
官而諸生爲之持服東漢之風依然不泯尙何

愧於儒邪又漢碑傳嚴氏春秋者有任城吳盛
惜其人之顛末不可得而知矣

○魏應字君伯任城人也少好學建武初詣博士受
業習魯詩閉門誦習不交僚黨京師稱之後歸爲
郡吏舉明經除濟陰王文學以疾免官教授山澤
中徒衆常數百人永平初爲博士歷侍中十三年
遷大鴻臚十八年拜光祿大夫建初四年拜五官
中郎將詔入授千乘王伉應經明行修弟子遠方
至著錄數千人肅宗甚重之數進見論難於前特
受賞賜時會京師諸儒于白虎觀講論五經同異

使應專掌問難侍中淳于恭奏之帝親臨稱制如

石渠故事明年出爲上黨太守徵拜騎都尉卒官

後漢書

儒林傳

○吳盛任城人傳嚴氏春秋

釋

○景君

名闕

任城人祖河南尹父步兵校尉治歐陽尙

書門徒上錄三千餘人

闕一字

司聘請流化下邳未

及考績以續母憂去喪畢故府復請司空太常博

士並舉高經君爲其元終鄉令元初四年卒

據碑見隸

釋

洪适曰景君三世傳歐陽尙書高弟編牒至三

千人公卿皆以爲明經舉首亦顯門之耆儒也
碑旣不載其名儒林傳惟有廣漢景鸞乃治齊
詩施氏易者范書罔羅疎畧蓋不止一郊令也

惜哉

隸釋

按景氏之族甚多有謁者景君又有益州太
守北海相景君附錄於此

○武梁字綏宗治韓詩兼通河洛諸子傳記州郡請
召辭疾不就元嘉元年卒子仲章季章季立孫子

橋猶子榮

據從事武梁碑趙明
誠金石錄洪适隸釋

○武榮字含和父開明永和二年舉孝廉除郎謁者

漢安二年遷大長秋丞長樂太僕丞永嘉元年哭
母去官復拜郎中終吳郡丞榮治魯詩韋君章句
傳孝經論語漢書史記左氏國語遊太學爲州書
佐曹史主簿督郵五官掾功曹守從事汝南蔡府
君舉榮孝廉爲郎中終執金吾丞靈帝初卒兄斑
字宣張敦煌長史

據碑及
隸釋

按武氏碑不詳何地人而有數墓當卽任城
人也

○何休字邵公任城樊人父豹少府休爲人樸訥雅
有心思精研六經世儒無及以列卿子詔拜郎中

非其好也辭病而去不仕州郡進退必以禮太傅
陳蕃辟之與參政事蕃敗休坐廢錮乃作春秋公
羊解詁覃思不窺門十有七年又注孝經論語風
角七分皆經緯典謨不與守文同說又以春秋駁
漢事六百餘條妙得公羊本意休善歷算與其師
博士羊弼追述李育意以難二傳作公羊墨守左
氏膏肓穀梁廢疾黨禁解羣公表休道術深明宜
侍帷幄倖臣不悅之乃拜議郎屢陳忠言再遷諫

議大夫年五十四光和五年卒

後漢書
儒林傳

○張匡字文通山陽人習韓詩作章句屢徵有道

士不就

後漢書儒林趙彞傳

○丁恭字子然山陽東緡人習公羊嚴氏春秋建武初爲諫議大夫博士封閼內侯遷少府恭學義精明當世稱爲大儒太常樓望侍中承宮長水校尉樊儵等皆受業于恭拜侍中祭酒光武每事諮訪

焉

後漢書儒林傳

○王弼字輔嗣山陽高平人尙書郎業之子好論儒道吏部尙書何晏甚奇弼歎曰後生可畏若斯人者可與言天人之際矣正始中補臺郎註周易及老子十年以公事免卒年二十四孫盛曰易之爲

書窮神知化非天下之至精其孰能與于斯弼以
傳會之辨而欲籠統元旨乎故其叙浮議則麗辭
溢目造陰陽則妙蹟無間至於六爻變化羣象所
效日時歲月五氣相推弼皆擯落多所不閔雖有

可觀者焉恐將泥夫大道

三國志鍾會傳并注○博物記曰初王粲與族

兄凱俱避地荊州劉表欲以女妻粲而嫌其形陋而用率以凱有風貌乃以妻凱凱生業業卽劉表外孫也蔡邕有書近萬卷末年載數車與粲俱亡後相國掾魏謀反粲子與焉既被誅邕所與書悉入業業字長緒位至謁者僕射子宏字正宗司隸校尉宏弼之兄也魏氏春秋曰文帝既誅粲二子以業別祭

○徐達明字子判本華陰人身長八尺幼孤好學年

十七隨鄉人毛靈和等詣山東求學至上黨乃師
屯留王聰受毛詩尚書禮記一年便辭聰詣燕趙
師事張吾貴吾貴門徒甚盛遵明伏膺數月乃私
謂其友人曰張生名高而義無檢格凡所講說不
愜吾心請更從師遂與平原田猛畧就范陽孫買
德受業一年復欲去之猛畧謂遵明曰君年少從
師每不終業千里負帙何去就之甚如此用意終
恐無成遵明曰吾今知真師所在猛畧曰何在遵
明乃指心曰正在於此乃詣平原唐遷納之居于
蠶舍讀孝經論語毛詩尚書三禮不出門院凡經

六年時彈箏吹笛以自娛惻又知陽平館陶趙世業家有服氏春秋是晉世永嘉本遵明乃往讀之復經數載因手撰春秋章義爲三十卷是後教授門徒蓋寡久之乃盛遵明每臨講坐必持經執疏然後敷陳其學徒至今浸以成俗遵明講學於外二十餘年海內莫不宗仰頗好聚斂有損儒者之風後廣平王懷聞而徵焉至而尋還不好京輦孝昌末南渡河客於任城以兗州有舊因徙居焉永安初東道大使元羅表薦之竟無禮辟二年元顥入洛任城太守李湛將舉義兵遵明同其事

民間爲亂兵所害年五十五

魏書儒林傳

按聚歛者北史謂懸納絲粟留衣物以待之名曰影質恐亦無傷况大節足取遵明宜在僑寓而附於此者從其類也

○曾壽字延齡景泰七年舉人曲沃訓導誘掖諸生多所成就嘗奏記當道撤淫祠以崇學宮秩滿歸盡出所有以遺族姓遷清源教諭卒諸生行服朝夕哭奠及歸負棺徒步數十里送至來陽津拜哭失聲而去

舊志在篤誼

○黃中理字純卿諸生也其先廣州番禺之土岡村

人以從軍來徙六世而生中理幼端方好性命之學謂章句新說失聖賢意取伊川考亭語錄及大全諸書晝夜研究有疑義未徹至自掌其面晚年教授生徒一以朱子爲準有友贈以句云窮年兀兀心源尙友程朱丰采稜稜卓見不淫佛老人稱東愚先生著有倔强編偶覺錄譙脩餘韻陋室放言杜律集注疾革呼孫維祺授以大學誠意章曰爲聖賢當從此下手遂卒

舊志文苑叅張玉書黃公維祺墓誌銘

○姜遇武字襟鳧桂芳子也歲貢生授內閣制勅房中書舍人與典籍王鍾麗纂修一統志性孝友捐

田瞻族異母弟九歲而孤撫卹周至遭家難外侮
狎至委曲調護之及弟長授以孝經義旨又手輯
各家註疏以成書總河周鼎爲刊行焉又精邵子
之學甲申正月忽解組歸蓋有先見云

舊志
文苑

○孫芳字企源號松雪父瀛洲見隱逸芳自幼端莊
好學父母憐其攻苦焚膏以漏二鼓爲度芳每竊
膏別貯以備不繼一日爲父所見遑遽曰大人幸
勿更令母知也中康熙二十六年鄉試主司謂其
經文似義疏可羽翼紫陽長洲何焯不肯許與人
獨心折於芳因其友劉汶潘兆遴與訂交焉試禮

聞黃內翰夢麟得其文愛玩不釋手他人覽者輒
欠身思臥崑山徐乾學常熟翁叔元方以聲氣振
拔天下士皆折節願交而芳終不一至其門自以
不諧於俗年將四十卽絕意不赴禮部試專心易
象好來知德易又得安溪李光地易解手錄之學
益進著易論若干篇善開引後進宋士正楊寬輩
皆其及門從游甚衆來者不拒而不輕往教在平
令王世臣慕道有古人風延芳主在山講壇因令
其子受業焉居在山二年時例得授內閣中書竟
不及補年四十五而卒芳取舍進退不苟文尙潔

冲淡如其人書法兩晉因號松雪人以趙吳興目之其實非也平生罕交遊惟與焯汶兆遯三人始終無間子三皆諸生長文丹字書常號拙翁幼承庭訓復從遊於汶苦志自勵貫串體驗旣而洞見古人實際經明行修人比之孫明復以早失怙曾一應舉不再赴遂於歷算方輿凡七政遲速山川扼要如指諸掌文學韓歐詩出入陶韋間訓子以義利之辨性耿介拔俗兆遯其婦翁也令天長延以訓其子歲受修金二鎰翁好藏書指以爲贈文丹但遜謝雖不却亦不取也耽山水就養子擴圖

掖學官舍其東南六十里有大澤山歲必一登撰
游記古奧幽逸爲時所頌著樂存堂詩文若干卷
詞譜韻書若干卷卒年七十二浙閩總制前山東

巡撫宏農楊應琚表其墓曰品純學粹擅圖乾隆

元年舉人十年會試明通進士由教諭爲烏程令

調任嘉興贈父文林郎

據葛祖亮孫先生墓志張淑渠孫先生傳

○劉汶字魯田號叔子其先確山人父毓秀以亂徙

遼左從何姓順治十一年副榜官至山東按察使

奉

命招撫川陝有功歸至濟寧卒留葬遂家焉汶性至孝且

敏悟讀書一過不忘又苦思力學經史九流百家
無不綜覽康熙二十六年以復州衛籍中山東鄉
試年十八因御史言汶宜隸漢軍遂入旗籍年二
十五乃慨然有志於聖道盡弃其學返而求之六
經著原命原性及誠者聖人之本論年三十二受
知

聖祖仁皇帝因得復姓遷居濟寧守墳墓

世宗憲皇帝潛藩時特見優禮每多諮詢

賜額讀書之室曰士林芝蕙著陳言書畧曰學於古訓乃
有獲凡天地人之道古人皆已言矣厭陳而喜新

則所學必非道謹撫前賢名論切於修齊治平世
世可行者約九篇曰敬天曰誠身曰務學曰樹人
曰取人曰用人曰養民曰教民曰循分汶兼善於
數自知終期集親友子弟曉以死生之理曰天地
之塞吾其體天地之帥吾其性猶大海之水其生
如水之凝其死如冰之釋冰釋仍爲水水復歸海
又何憾焉端坐而逝年三十八門人孫文載等輯
其書爲陳言一卷

召對一卷太極圖說論二卷女訓一卷同零堂詩二卷

雜文一卷子三栢榕桐

據劉氏家傳

○宋亮字均禮魚臺人魁梧英發涉獵經史洪武八年辟本縣儒學訓導以古道率士數年之間風俗丕變未幾應經明行修詔拜福建右叅政撫綏有聲民懷其德值大災引咎罷歸優游耕釣鄉人化

之

兗州府志

○郭廷珍字映賓金鄉人舉雍正元年鄉試性剛正言動不苟居家授徒教人先執禮使有準繩函丈間衣冠整肅小跛倚必懲說經隨事剖析義利卒年七十七著有四書偶同然集經史諸稟

兗州府志

文苑

濟州介於古高平山陽之間當魏晉時文學之士輩出其流傳者不乏而文章叙錄於任城得公達一人史謂其所著文賦頗傳於世惜不可覩矣永嘉南渡齊魯人才並遷吳會而右軍蘭亭之會於任城得二人焉曰呂系曰呂本惜又僅留其姓名而已然則湮沒不聞者可勝道哉舊志文苑自魏鐸以下若干人多篤行窮經之士得毋以文采掩其至行與今改從其類得孫該以下若干人焉

○孫該字公達任城人強志好學年二十上計掾召爲郎中著魏書遷博士司徒右長使陳郡太守景

元二年卒官

三國志注

○王粲字仲宣山陽高平人也曾祖父龔祖父暢皆爲漢三公父謙爲大將軍何進長史以疾免卒于家獻帝西遷粲徙長安左中郎將蔡邕見而奇之時邕才學顯著貴重朝廷常車騎填巷賓客盈座聞粲在門倒屣迎之粲至年既幼弱容狀短小一座盡驚邕曰此王公孫也有異才吾不如也吾家書籍文章盡當與之年十七司徒辟詔除黃門侍

郎以西京擾亂皆不就乃之荊州依劉表表以粲
貌寢而體弱通脫不甚重也表卒粲勸表子琮令
歸曹操琮納其言曹操辟爲丞相掾賜爵關內侯
後遷軍謀祭酒魏國既建拜侍中博物多識問無
不對時舊儀廢弛興造制度粲恒典之屬文舉筆
便成無所改定時人常以爲宿構然正復精意覃
思亦不能加也著詩賦論議垂六十篇建安二十
一年從征吳明年春道病卒年四十一

按金鄉志藝文王粲雜詩次以王徽思婦臨
高臺一首云魏時邑人不知乃王導曾孫王

微劉宋時琅邪臨沂人與金鄉無涉微文選

間誤作微

○呂忱字伯雍任城人晉義興王典祠令又爲弦令
博識文字工書篆表上字林五篇萬一千八百餘
字江式謂其附托許慎說文而按章偶句隱別古
籀奇惑之字文得正隸不差篆意也忱弟安復令
靜倣故左校李登聲類之法作韻集五卷使宮商
角徵羽各爲一篇而文字與兄便是魯衛音
讀楚夏時有不同

張懷瓘書斷參北魏
江式傳隋書經籍志

按字林隋志作七卷江式傳作六卷韻集隋

志作六卷

○王沉字彥伯高平人少有俊才仕郡文學掾嘗作
釋時論以明其志時王政陵遲官才失實君子多
退而窮處遂終于里閭

晉書文苑傳

○檀超字悅祖高平金鄉人也祖疑之字宏宗宋南
瑯琊太守父道彪字萬壽位正員郎超少好文學
放誕任氣解褐州西曹蕭惠開爲別駕超便抗禮
惠開自以地位居前稍相陵辱而超舉動嘯傲不
以地勢推之張目謂曰我與卿俱是國家微賤時
外戚耳何足以一爵高人肅太后惠開之祖姑長

沙景王妃超祖姑也故超以此議之惠開欣然更
爲刎頭之交後位國子博士兼佐丞超嗜酒好談
詠自比晉郗超言高平有二超又謂人曰猶覺我
爲優也齊高帝賞愛之後爲司徒右長史建元二
年初置史官以超與驃騎記室江淹掌史職上表
立條例開元紀號不取宋年封爵各詳本傳無假
年表又制著十志多爲左僕射王儉所不同旣與
物多忤超史功未就徙交州于路見殺江淹撰成
之猶不脩也時有豫章熊襄著齊典上超十代其
序云尚書堯典謂之虞書則附所述故通謂之云

書超叔父道鸞字萬汝位國子博士永嘉太守亦

有文學撰續晉陽秋二十卷

南史文
學傳

○魏鐸字子木少孤事母至孝穎敏博學師楊演爲
文簡質詩詞雅鍊善畫精研律呂著在野集數十
卷其陰陽律呂等論皆發前人所未發高隱不仕
守道安貧自號在野逸民元世祖末山東行中書
省薦鐸賢行堅辭不赴及母卒哀毀得疾行省復
辟而鐸已死矣

舊志

○王通字廷學自號蘭谷喜詩酒每興酣落筆千言
不休嘗烏巾野服造郡宰驚歎以爲神仙中人與

一時老友爲著英會著有蘭谷集

舊志

○周麟字德昭中景泰元年鄉試仕山西太原訓導

造士有方修太原諸屬志有史筆志載神童王瓊

七歲通五經善大書乃其高第弟子也英宗閱志

取試之稱旨升麟知本縣未任卒有詩詞遺藁

全上

○趙弼字雪航少好學補郡學弟子賦感興詩人謂

似太白酒風中景泰元年鄉試二年教授睢州以

親老歸年五十餘卒有竹雪齋集通鑑論斷行於

世

全上

○劉溥字潤民楨子也弱冠淹貫羣籍中景泰四年

鄉試第一資性和粹動止不苟其驅妖僧一書真

正心修身之學所著有學庸貫通及詩稿

全上

○宋塘字守唐好學善屬文正統間歲貢任陳州學

正遷澤州以足疾歸筆耕自活有觀洞靈泉詩爲

人傳頌晚年益貧而著作益富有濩澤宛邱歸田

詩藁

舊志卷之六
明詩鈔本傳
山左

○賈綸字綜理性行純篤形貌豐厚深明易理博學

高才而老於場屋年六十三卒

舊志

○李煥字文昭多才善詩嘗月夜登太白樓投筆題

詩壁上龍蛇飛動人以爲仙所居宅西有秀環書

舍曰與兄弟賓友燕坐其中商榷古今卒年僅三

十五

上全

○周品字嶧山正德中貢生學識淵敏著述甚富皆

散佚惟濟寧衛志存

舊志見
科貢

○陳學詩字以正幼聰敏讀書目數行下年十五與

弟學易同日補弟子員有雙璧之目嘉靖中學詩

以歲貢授清豐訓導不數年拂衣欲歸初學使愛

其才值監試日風雪令諸人賦詩每句限用風雪

二字學詩立成七言律十章學使歎服留之不可

著有衡門吟二卷清豐紀行詩二卷孫魯字省菴

家貧質復鈍借書手錄勤苦力學心悟忽開尤深
於易遠近多就正之萬歷己丑以歲貢爲興化訓
導未幾卒子伯友仲翁據家傳

○王梓字琴可萬歷七年舉人性不好依阿嘗讀書
浣筆泉上歎曰吾其尙友謫仙乎詩賦亦有太白
遺風王氏世有隱德父邦俊以齒德重鄉梓登賢
書以母不及見慘然不樂人嘉其孝與楊春茂黃
子美楊暉友善以名節相砥礪濟人高其誼多受

業焉

舊志
下全

○楊春茂原名次栢字開泰萬歷七年鄉試第一春

茂性剛正篤於忠孝赴禮部試時張居正方秉政
春茂對策有大臣不可無權臣不可有之語主司
大駭弃去又欲具疏劾論居正所親扼之不果歸
旋卒

○鄭容字相涵真之曾孫性廉靜博雅有高才事親
孝父疾藥宜受霜氣時嚴冬容衣冠跪捧器終夜
父果愈中萬歷四十三年鄉試數上春官不售遂
不復出知州以公車幣至却之流寇至被掠索金
容無以給賊將殺之容大言曰吾死爲厲鬼殺賊
耳賊見其神色特異舍之歲丁亥乃卒人謂不

孝廉兩字者惟鄭容一人而已

○鄭耕字枕于容從弟生而穎異家多典籍悉白手錄胡瓚督泉濟上課士得耕卷有辭句質之曰語出莊子注胡肅然起敬學使合試二十七城拔耕第一萬歷三十一年秋試擬元以疵被斥尋病卒人至今傳其荆軻入秦論

○趙洙清字素水天啟四年舉人體豐偉朗如玉山授諸城教諭遷贊皇令曠達疎放不樂簿書謫湖州照磨升瑞州推官以簡恕爲政多所平反耽吟好飲湖州山水游歷殆遍與府僚縱飲窪尊亭醉

臥竹林方春筍怒茁至胷衣敗面與寄彌深書法
瘦勁在贊皇時搜古石刻得檀山周穆王吉日癸
巳籀文又得定州東坡雪浪齋石盆銘甲申後遊
匡廬展轉吳越十年始歸隱於荒村簪笠草衣修
髯高屐兒輩隨譟之目曰異人其故宅近學宮蓬
蒿滿徑而問字者不絕呂顯祖李壯扈宏皆其弟
子也

○萬朝京字太元天啟時貢生有高才而篤行聞於
鄉里以謁選卒於旅舍無子門人楊士聰歸其喪
朝京教授幾六十年州中科第半出其門

○王道明字逸公博學多才天啟七年舉人試禮部以策犯魏璫罷歸道明論說以朱子爲宗爲文簡古結社城南談藝不倦以時事日非因寄懷詩酒嘗曰屈宋李杜吾師乎憂國之辭時見於筆墨父歿以哀毀病卒子宏與弟道新同舉進士

○鍾應銓字宸俞有雋才崇正元年拔貢廷對以縣佐用應銓不樂仕教授於家周卹里黨未嘗有德

色子姪稱名士者十餘人

以上並舊志

○劉正慶字開先數歲能文崇正七年進士出文震

孟之門又善書授東光知縣未任卒

史外傳逸

○戴洸字紫瀾明末諸生博學能文嗜奇好古文類
天池生詩宗李杜又精人倫鑒性峭直不爲人所
喜久困諸生時縱談游俠叅究釋老與楊士聰李
用質善及卒士聰誌其墓又刻其小憩餘言僅齋
率筆皆燼於寇用質又刻之姑蘇撫其孤以成立
三人交道始終不渝士聰輓以句云羞持許下通
人刺笑謝長門買賦金蓋實錄云

舊志
下全

○于驥逸字天房幼敏悟於書無所不窺文名譟齊
魯省試不利乃研精律呂爲樂府傳奇又精書畫
山水花卉人物入妙品楷法章草隸篆皆追古

旁及奇門六壬太乙天官等書性不諧俗遯跡吳越山水間明末天下亂草衣籜冠與漁樵爲伍士大夫從求書畫傲然不顧或方外者流一言契合則窮日夜談不倦卒後詩文散失子瑄裒集爲若干卷藏於家

○王天寵字戴霖性端方孝友年未弱冠補弟子員綜理羣典行文力追大家順治初以恩貢生授通判未銓卒子炯字子仙弱冠時卽有古人風精於宋儒諸書河帥張清恪曾延以訓其子後以貢入成均

○朱明字用陽順治中歲貢生後爲臨淄訓導博學能文工山水卒於官士大夫重其手蹟咸奉爲墨寶云

○呂顯祖字翼仍一字裕雲正音孫有聲庠序總河楊方興延以爲師已貢入國子監順治五年登進士第改宏文院庶吉士以母病假歸母稍愈而顯祖以念母之故得疾又聞

世祖章皇帝賓天大慟母又卒而顯祖遂不起子某猶子

某咸有文名

史外傳逸

○潘濬字星源順治三年貢生堂邑訓導文譽有河

陽之目著南游草海上吟

採訪下全者省注

○楊通睿字聖喻父士聰卒於常州之戚墅堰通睿扶輓回里遂不談榮利與弟通俊通久通俶通佺號五楊有鴿原集通俊字聖企號樗菴靜穆溫醇爲文典雅秀麗見推於王士正康熙十四年以貢生官蓬萊教諭課士有方凡十八年成就者甚衆好游覽日或不再食不以介懷謝任歸閉戶著書四方名士至濟者無不過焉年七十九猶好學不倦著有烟霞紀遊斲老菴漫草等集

按陳檢討楊聖期竹西詞序云雲橫魯甸瞻

望兄兮誰來然則聖期卽聖企也期企音近未知孰是通久字聖宜倣字聖美佺字聖朝

○鄭序字鷺墀號鹿痴與僑子博聞強記以諸生老康熙十二年與修州志年八十餘卒又侯尊祖字

社文善書畫及詩與序齊名

史外傳逸叅知非瑣言

○臧子彥字兆雍一作咏居州學東順治八年補州學

生卽有聲庠序篤實孝友嘗集同里及流寓名人

制義爲一集附書其生平行誼爲史外傳逸四卷

鄭序敘之曰先生是書根諸性靈原於道德洵不

誣也子二長發世鸞

據史外傳逸知非瑣言

○孟淑尼字自淑康熙五年以策論中式初選長山教諭後補平度勤於訓士卒官人頗思之

上全

○潘淑葛字竹溪文行有名於時康熙八年鄉試第一濟州發解者自前明永樂戊子劉翀至淑葛凡

八人

上全

○李士凱字良賡爲人持重有器識能文章淹貫諸家尤究心於易康熙五十八年由選貢爲陵縣教諭黜浮華崇實學人文蔚興居鄉多倡義舉人咸賴之治家嚴正爲里黨所矜式年九十卒所著有詩文藁四書格言易經疏義

○劉淇字龍田一字武仲生有異秉學問博洽詩歌
記傳皆卓然名家書法會萃衆體自成一格畫亦
稱逸品與弟汶皆受知於

世宗憲皇帝有二難之目著衛園集四卷堂邑縣志二十
卷助字辨畧五卷周易通說禹貢說若干卷

○仲蘊錦字闇江仲子大宗也讀書多識以詩酒白
娛江南劉荻江濮州陳周璜曲阜顏肅之常與過
從唱和著有宸翰樓詩集

○黃敬球字憂之九齡而孤依伯兄敬璣時敬璣官
於朝居顯要敬球獨淡於仕進致力經書性理之

學人不敢干以私後以貢選臨朐訓導抵任卽歸
雍正元年州舉孝廉方正力辭布政使親造廬趣
之乃起未及入都而卒

○戴景憑字五席詩人紫瀾之後以歲貢教授里中
爲文沉著理深波富場屋抄寫者無不如意景憑
自運則不售人人爲稱屈業之終身弗恤也五十
餘始連舉子皆諸生而仁行庚戌登進士猶及見
之於時時髦接踵至里黨有大事筆墨之役必曰
此非戴先生不能

○靳秉瑗字復蘧潛心理學下筆千言立就試輒冠

軍與陳孟養潘汴琅相甲乙濟上知名士半出其門爲人溫厚和平而涇渭不稍假借歲貢成均以族姪科場事受累人皆惜之卒年八十四

○潘汴琅字浴青貢生嘗肄業白雪書院名重歷下晚爲樂陵訓導適歲饑上官屬以散賑票汴琅於冊籍外多散三百餘戶上官責之乃抗言曰貧民嗷嗷待食者衆按戶給票豈按冊給票乎數年以疾去天性孝友兄弟產落復推已產三分之一妻喪不再娶號清溪道人學有心得詞翰雅麗有檜樹賦爲黃叔琳所稱精內養法年八十視聽步履不

衰後無疾卒載樂陵志名宦

據家傳

○陳孟養字浩然號義齋十歲能文康熙四十二年副榜貢生性耿介總河張鵬翮立濟陽書院聘孟養爲師人以爲震川復出年五十九卒無子知州吳樸表其墓曰文介先生

○高衡字洞十恬淡不思仕進遇窮乏每有施濟闢園東郭與知己飲酒賦詩康熙五十二年以貢選陵縣教諭弗就

○楊寬字雪閣康熙五十六年舉人屢試禮部不售退而種藝自給造次不離禮法少從孫芳遊師歿

數十年過其家必祭而後食後生英俊遊其門者
皆俯首就範至今談師弟子者猶以雪閣爲矜式
云

○楊淇字青巖濟舊族所謂班村楊也早歲食餽從
二劉游又與弟洽游於孫芳之門洽攻苦卒淇日
感傷值師又歿淇痛益深平生工爲文至是任人
取攜去每作佳書自珍貴嘗謂同學戴文謚曰若
書浸有唐格尚乏晉味耳意蓋自賞至是不復作
作亦不復惜也方習業時劉白京師寄書云崛起
會試不中式以才名入翰林稽古之力如此青

德輿諸君子可以興矣劉以屺瞻期之則淇可知
一時名士如林而土木形骸風流深蘊獨淇逼古
人焉

○高鑑字心水州學廩膳生康熙中曾修鄒縣志

○劉沛字仲簡嗜金石工書翰與文學孫文載楊淇
相友善居近市廛性耽幽潔於西湖置別墅一區
紛植花木中藏萬卷顏曰還讀草廬又祖塋旁與
兄深創立宗祠內有亭有臺有軒有山有池往來
者咸服其高致云深字潛夫以畫傳

○呂芳振字子威顯祖之孫爲諸生時學使徐炯黃

叔琳推爲國士康熙五十九年舉於鄉屢上公車不利自是專意窮經教授里中凡承指授者文章皆有法度可觀年七十三卒

○孫文載字德輿少從劉汶遊尤邃於易文章有奇氣兼工書法生平厲廉隅志淡泊治家嚴肅垂老爲臨邑教諭旋告歸卒年八十餘猶日誦先儒語錄不輟子統增生學行醇粹克繼其業云

○陳楷字胥寬爲諸生孝友廉靜和易端方博覽羣書究心於掌故海寧陳相國世倌撫東時親造其廬諮利弊贈以匾云學充養裕雍正初舉孝廉

正

賜六品服以年老辭歸居城北環渠村舍自號一齋老人
尤工書畫人得其片紙如獲拱璧卒年八十四按
察使劉栢爲之傳

○趙司講字觀顏蕃次子早爲名諸生蕃罷官後以
倉穀霉折留靜海不得歸諭長子隨侍而令司講
率弟姪輩在家攻苦司講根柢精深益加揣摩卓
然大成辛酉拔貢旋魁北榜弟若姪亦連取科甲
濟人稱仰謂司講拾青紫若地芥也顧數入禮闈
文高命蹇卒不遇晚得四川樂至知縣未任又改

濱州學正則司講已病困且卒矣司講五經皆通
年七十猶時時冥搜於注疏之外其教後生亦必
五經上口漸熟義意而後指授作文之法先正時
髦兩不偏廢及門多獲售或冠軍孫玉庭在門牆
尤後進深所賞器竟成進士入翰林距其歿纔半
年耳

○侯位字宜在積學能文章尤深於易及程朱語錄
凡習易者多就正之爲諸生試輒第一雍正五年
有司舉孝友端方不就教授生徒知名之士半出
其門年五十餘卒著有讀易隨記一卷

○陳際雲字步青展則曾孫拔貢生少負奇氣不肯爲經生家言長乃好學縱覽經史諸家見輒破的從游者甚衆及沒士林爲之流涕無子以猶子應泰爲後

○鄭其誼字董帷號思圃與僑曾孫敦品勵行博聞強識老益精核嘗續修譜系先世富藏書兵火後散失大半其誼搜求手澤不惜質衣購之老屋十餘間卷軸之外無長物也少從劉淇遊工詩善書法往歲大歉當事散千金分諸生膏火資其誼父子獨不至或問之曰吾父子今年幸有館穀君不

知耶乾隆某年卒年八十一子本茂字居實號秋巖廩膳生善書工文未及貢而卒

○潘如字乃平號小魯學士應賓從子少聰敏能詩

文工書善談諧雍正七年拔貢見知學使王世琛

乾隆元年中順天鄉試選棲霞教諭未任卒

山左詩鈔

○王殿選字耔登爲人恬靜沖淡孝友性生以授徒供菽水工詩文中乾隆十五年鄉試授夏津教諭潔修自矢勤於訓士以父艱歸旋卒

○李懋縉字大神貌寢有異才運河道楊三炯觀風試士桐城方苞爲閱卷拔置第一謂君文雖小疵

而大醇矣性傲岸不能容物有不可其意雖富貴人必謾罵之著有四書講義兼工詩畫

○黃業炘字明徵以曲阜籍中乾隆十二年舉人家貧力學操行端方爲諸生三十年教授生徒循循有序率多端士屢困公車而志不少衰乾隆三十六年恭逢

皇太后八旬萬壽恩科以會試舉子年逾八十以上

特恩賜翰林院檢討蓋異數也業炘以耆宿碩德得邀曠典閭里榮之咸謂稽古砥行之報云卒年八十六

○張丕吉字伯嶼嘉祥人性敏好學詞賦尤工前癸

未進士

國朝授翰林院編修分校禮闈所拔多知名士時纂
修明史同輩每推之曰此非張伯嶼不能也尋以
父憂旋里服未闋卒所著有皇華偶記

忠節

見危而能授命士之所以異於衆人也然舍生
取義之心人皆有之賢者能勿喪耳如志所稱
李應奉者雖宋之文山何以過焉而徐標之白
虹貫日氣燭霄漢可與後先輝映矣又任民育
楊佩李燭楊定國諸人同出一時於以知致命
遂志之士代不乏人惟幸生承平之日無自而
見耳於乎成仁取義豈一日泯於人心哉

○李演字巨川泰和六年進士第一除應奉翰林文
字再丁父母憂居鄉里貞祐初任城被兵演墨衰

爲濟州刺史畫守禦策召集州人爲兵搏戰三日衆皆市人不能戰逃散演被執大將見其冠服非常且知其名問之曰汝非李應奉乎演答曰我是也使之跪不肯以好語撫之亦不聽許之官祿曰我書生也本朝何負於我而利人之官祿哉大將怒擊折其脛遂曳出殺之時年三十餘贈濟州刺

史詔有司爲立碑云

金史本傳

○趙德勝世居濟寧元末濠州兵起德勝以材武爲明太祖帳前先鋒後克和州升總管屢立奇功自領軍歷左副元帥升統兵破漢收江西諸郡應安

慶降南昌祝康叛從復南昌授僉江南行樞密院
事協守南昌統精兵爲戰將癸卯漢圍城德勝出
戰射殺漢別將漢益兵晝夜急攻城且壞德勝先
諸將死戰且戰且築城壞復完巡城至東門敵發
蹶張弩中胷箭深入六寸卽拔出拊髀歎曰命
也奈何大丈夫死卽死恨不能從主上掃清中原
垂名竹帛耳卒子獻領其衆漢平贈梁國公謚武
莊特祀南昌爲諸臣冠德勝沉鷺簡靜剛明質直
馭下嚴肅號令一行旗幟改色平生未嘗讀書隨
機應變智畧如神臨難不思奮不顧身孫輔事太

宗有功封武靖伯世襲崇正甲申李自成破京嗣
武靖伯祖芳死之今濟上趙氏裔尙數十人多有
爲諸生者

舊志
下全

○張鑑濟寧衛千戶宣德三年征交趾陷泥坑陣與
千戶吳與百戶張勇力戰死之

○鄭瑄正統中進士爲刑部主事己巳英宗親征也
先駐蹕土木堡瑄在扈從列王師敗績帝北狩瑄
死於難

○張鳳濟寧指揮正統己巳從征也先與指揮盧
胡俊百戶蕭漢俱力戰死之

○王清字一寧濟寧衛人官指揮多勇畧能詩初率
所部出塞覘敵至鴛鴦海有詩云落日龍荒覘鹵
還劍光直射斗牛寒少年氣節應無敵肯負平生
一寸丹正統中升廣東都指揮平大藤蠻同總兵
駐軍高州賊衆十餘萬圍廣州清帥舟師赴援至
沙角尾水淺舟膠被執賊不敢害投水不死囚寄
衣還家並附詩云兩捧天書鎮百蠻却因兵敗不
生還飄飄身世輕如葉磊落襟懷重似山半夜愁
吟珠海月幾回夢墮鬼門關憑君獨有衣相寄爲
我招魂宇宙間數口賊擁清至城下使諭降清罵

賊不絕口遂遇害有建囊集行世

○汪應科貢生武城訓導崇正十一年守城死難

武城

縣志

○徐標字準明號鶴洲幼擅聖童之譽讀書慕節烈

慨然有當世志天啟五年成進士知信陽州躬行

境內勸農桑旱禱震雷山設奇策捕蝗以最遷都

水郎督南河塞建義決口修高寶石堤擢河南僉

議備兵徐州河溢常山口標胼胝畚鍤間數閱月

河復安瀾豫寇突犯江淮合二十四營圍徐州意

取道掠齊魯以搖畿輔標親冒矢石遣精銳間出

破擒渠帥殲馘甚衆蓋流氛躡秦豫而不能東入者以此捷也莊烈帝審標可倚用將議升州爲府以標撫之統大名歸德兗徐聯絡四省便宜援勦會標內艱歸內外交章論列無虛日起補鳳泗監軍尋升副都御史撫畿南陛見慷慨陳時事得失內外機宜帝爲欬歔復奏屯田車戰諸策反復數千言帝改容納之諭曰雪恥復讎治軍殲賊一以付卿朕不中制所需軍餉屯本該部速與給發卿能爲朕一年作十年之計則善矣標出夜漏下二十刻矣賜內膳金帛抵任劾屬吏不法者條上興

屯選練及地方利病二十餘疏皆允行李賊犯山西晉兵部右侍郎督畿南山東河北俄而宣大相繼陷晉標尙書改督援兵調督師閣臣李建泰入衛旨出二日而變聞上震悼議恤而國事不可爲矣初賊渡河盤踞汾絳中分各隊李自成攻總兵周遇吉繞塞東下僞將劉宗敏掠懷衛邢洛趨眞定標令諸將防龍固援居庸自統大衆當南面又移總兵馬岱於保定曹有義於河間爲犄角是時道路梗阻徵解不前屯聚旣久糧不繼標方整兵飭備以捍蔽京師忽偵騎持僞檄至標怒碎牌立

斬之集衆鞠旅以死自誓叛弁李茂春等執標城
上標裂眦奮罵不屈賊抽刀砍中標項死之是夕
白氣亘空如虹半天盡赤老稚咸爲流涕

國朝順治初督學御史曹溶巡按御史趙進美先後
題請卹典寧夏巡撫黃圖弔以詩標有文武才畧
歷官慈惠循聲特著居鄉恭慎樂善知無不爲且
博學能文賦詩草檄咄嗟立成真定汝寧徐州高
郵俱祀名宦所著忠孝廉節集四十卷兵機纂要
四卷又小築邇言小築近集金石韻府河防備考
諸書傳於世

○任民育字厚生居泗水上家世業農民育始讀書
爲儒年二十六補諸生中天啟四年鄉試民育雖
書生居嘗倣儻好奇計崇正戊寅牆子路之警總
河侍郎周鼎北援臨清以運判馮元颺署濟寧道
事城守雅知民育引叅軍事會閹人高起潛軍至
所部丁志祥縱兵大掠元颺捕斬數人起潛大恚
責取濟寧不用援兵狀元颺以問民育決計與之
濟寧以安壬午

天兵再下山東及濟寧民育城守益力遂去而攻兗
當路知民育有將帥才於是淮撫史可法以通

請保撫徐標以監軍請吏部基之授潁州知州顧
數被兵民多保聚人自爲守民育至更團結部署
身任師帥兵事之隙問民疾苦三月顧大治田中
流寇犯闕鳳督馬士英南奔民育與觀於庭集衆
誓死守金陵建國史可法以閣部督師揚州乃舉
民育知府事未幾高傑黃得功爭揚州戰於城外
軍中失得功可法將以黃蜚乙那才兵攻傑民育
力言不可乃止翌日得功間道歸營其能斷大事
皆此類也傑爲許定國所殺其麾下自河南竄歸
願隸督府可法不納民育言得此勁旅外可以拒

敵內可以制四鎮納之便勿聽亡何

天兵大至民育乘城守禦日夜綦嚴而可法守舊城
衛允文守新城事權不一會天雨城圯遂入之民
育緋衣坐堂皇飲刃死揚人間之皆泣下先一日
星隕於署櫪馬皆驚民育自分必死散遣諸妾惟
寡女適劉氏者與一女留署中至是俱縊死從死
者幕客陳美僕鄭邦志許登進文道等五人皆濟
人妾姚氏揚人投水死三子鍾華鍾蘭鍾崧走匿
民間得免

王士正漁洋文畧
叅鄭與僑遺事記

王士正曰予以順治庚子理揚州士大夫爲

述民育事甚烈民育畢命在太守廳事西僞血凝碧陰雨猶彷彿可見時距其死十六年矣

○楊佩字荆璧天啟七年舉人以充郡守王國賓保舉授保定縣知縣有政聲崇正十五年冬已遷河南鄧州知州未離任城破殉難事聞贈山東布政司參議弟仕僎流賊入濟繫仕加榜掠大罵不屈賊敬而釋之後壽至九十餘僎博學強識手抄文天祥謝枋得以下諸人傳附以己評爲忠義錄一

卷舊志參遺事記

○李燭字明遠崇正三年舉人初任濱州教諭升深

州知州十五年城破殉難贈山東布政司叅議祀

四忠祠

舊志

○湯三俊崇正初以例貢爲南平縣丞歷寶慶府經

歷武昌府通判流寇破城三俊死之闔門殉節

舊志

叅遺事記

○楊振宗以衛指揮歷安慶都司左都督乙酉四月

左良玉東犯振宗出禦川營標將內叛闔門殉節

僕宜城負振宗幼子出奔備歷艱危竟得全

遺事記

○阮應兆新挑河人饒膂力挽强善射中武進士第

七人初授山東都司再升遊擊隸劉澤清標下治

兵江淮後澤清奎淮入海應兆時鎮守安東聞變

痛哭而死

全上

○陳善

美一作

業儒有行揚州知府任民育延以訓子

民育死節善曰義不獨生遂與妻對縊

全上

○孟珽者宿松知縣瑄之弟州武生隨瑄南遷史可

法欲大用之城陷死

全上

○楊定國字寧宇浩之後也補諸生名在第一好古

文辭甲申四月李自成僞將軍郭升至濟拷掠之

慘人不能堪定國作帶血吟百首遍書諸身戟手

大罵自問必死賊以其貧置之

國朝定鼎以戶部侍郎淄川王永鰲招撫山東檄至衆議投誠定國乃携家南都依御史故濟寧知州王孫蕃及孫蕃出按江西寄家杭州定國復從之尋

大兵至潞王迎降時魯王監國畫江而守定國上謁王嘉其義授官行人未幾江上師潰報至是夕痛飲閉戶佩一崇正錢於胷自經同里任孔當歛之面如生殯王莊初揚州破定國寄鄭與僑書有云書生報國緩則托之語言急則授以性命之語至明年五月果踐其言

漁洋文畧

○房星字景璧順治十五年武進士選侍衛尋授廣

東白鶴營守備康熙元年奉委防汛海寇突至率

衆鏖戰賊大挫兵退單騎爲殿會夜賊衆環攻星

短兵接鬪所向披靡擊傷賊百十八馬蹶被殺事

聞部議恤錄戰沒諸將官其子日兔拖沙喇哈番

卽雲世襲帶濟寧衛左所千戶俸五年授職舊志

騎尉乾

隆三十三年草恩世襲恩騎尉十七年曾孫煥

承襲官漕標右營守備煥子英長三十三年承襲

官克鎮

千總

○惠世溥班村人曾祖應詔家本永平順治初賀珍

圍西安應詔出奇擊殺之提兵入蜀取潼川綿竹

殺賊姚黃等以功

賜二等阿達哈哈番

即輕車都尉

准襲五世仕至成都總兵祖

占春於十八年奉

勅注籍潼關衛官沂州鎮總兵復

賜籍濟寧衛父延祖大名協副將世溥於乾隆十三年承

襲歷澧州營叅將至廣西左江鎮總兵以事罷職

給叅將銜効用川北鎮從溫大將軍征金川攻木

蘭堪美諾諸險皆先登戰章固空卡俱有功乾隆

三十八年六月十日至木果木陷敵陣亡

恩卹銀五百兩

賜祭葬四十二年以其長子之芬承襲世職廕其次子

之藥年十五候補守脩

據文案

○曹竟字子期山陽人王莽篡漢去官不仕更始徵

竟以爲丞相不受會赤眉入長安竟手劍相格不

克死之

漢書○以下三邑

○檀憑之字慶子高平人少有志力爲世所稱從兄

子韶兄弟五人皆稚弱而孤憑之撫養若已所生

初爲會稽王驃騎行參軍轉東莞太守加寧遠將

軍與劉裕有州閭之舊又數同東討情好甚密義

旗之建憑之以私艱畢經而赴裕以爲建武將軍

後爲皇甫敷軍所害追封曲阿縣公

晉書

○檀斌高平金鄉人晉明帝時爲兖州刺史時石勒遣其將石良寇兖州斌乏救力戰死之

全上

○劉持中字遵道金鄉人元內臺御史出鎮湖廣省寇至持中躍馬出禦爲賊所執欲降之怒罵不屈

遂遇害

兖州府志

○周永康字安侯金鄉人有勇力曉兵法明末爲本邑守脩土賊蜂起永康率鄉兵禦之所向無前一日乘勝逐賊馬蹶遇害部下力戰死者四人衆爲之立廟

○王運升字一復金鄉人順治初以鄉勇從典史馬
失名勦賊遇之于會民集陷入重圍斫數人賊驚潰
因逐其魁馬躍被害賊攢戟碎其尸

此係據
縣志

○周如春字麗陽金鄉人順治初由歲貢出宰星子
金聲桓反如春固守城陷死之妻張氏妾吳氏家

人二十口殉焉士民爲建忠烈祠

克州府
志下全

○高瑞光字慶吾嘉祥人性倜儻有武畧嘗出家財
修城爲戰守脩崇正十四年硃寇掠縣四境瑞光

鬪死

○劉士俊嘉祥人以材勇爲河院旗牌官數殲巨盜

一日乘勝逐賊賊散走士俊單騎回至范山谷口
解甲坐息一賊伏石竇中突出刺其脅士俊抽刀
斷鎗殺賊竟以重創死

○范謙亨魚臺人貢生爲睢寧縣丞以剛方不能俛
仰致政歸悠游文翰爲學者宗子魯南亦善屬文
有聲庠序甲申城破正衣冠危坐堂上子侍側同
死之

○仇應曼魚臺貢生性剛正遇事敢言邑有大徭役
咸依賴之賊掠穀亭被縛脇以刃不屈至死罵不

絕口

○馬體震魚臺庠生以義勇自負順治初山寇擄掠震糾衆捍禦一方咸賴之一日賊大至震奮勇衝鋒爲所圍外救不至殺賊數十人而死鄉人爲之立碑焉

按明末有朱錦者州之東鄉人也當流寇攻城甚危聲言欲殺者知州一人耳能送出可免屠城朱貌似知州自請以身代易衣縋城而出賊磔之而去蓋逢丑父之流也自後州祭厲壇必爲朱首設一席稱爲將軍徹其祭者朱之子孫也至今猶然傳聞異詞又朱之

子孫多務農不知始末故未能遽爲之傳
記于此以俟後之人焉

